

AWIG – AWIG DESA SINGAKERTA



**DESA SINGAKERTA
KECAMATAN UBUD
KABUPATEN DAERAH TINGKAT II GIANJAR 2020.**

NYASA DESA ADAT SINGAKERTA

Nyasa utawi lambang Desa Adat Singakerta mewasta : KESARI ANGLAYANG.
Nyasa puniki medasar antuk warna putih tur masengker antuk bucu lima. Ring

sajroning senger bucu lima punika medaging gambar utawi ceciren akaeh ipun 9 (sia) seroh, duaning angka 9 pinaka angka sane pinih ageng. Soang-soang gambar miwah ceciren artos ipun sekadi ring sor :

1. Ongkara, marti : Ida Sanghyang Widhi Wasa sane maka pangewisesa miwah sangkan paraning jagat tur sarwa mauripe, semalihe Ida wantah tunggal tan wenten kekalih.
2. Sing, marti : Sang meraga pemimpin sane wicaksana tur uning nepasin iwang miwah patut, tur maka pengayom ring krama mewastu prasida kepangguh katreptian miwah kasukertan.
3. Bunga tunjung, marti : Ksucian miwah kadegdegan kayun rikala nyangra Desa Adate.
4. Padi lan kapas, marti : Adil dan makmur gemah ripah loh jinawi, murah sandang pangan sane kaulati olih krama Desa Adat Singakerta.
5. Gelang Tiga mawarni barak, selem, putih marti : paiketan krama Desa Adat Singakerta sane kaiket antuk Pura Khayangan Tiga.
6. Bulu kapid 6 katih marti : Desa Adat Singakerta puniki kesangra olih 6 Banjar Adat.
7. Sloka : SATYAM EWA JAYATE, marti kapatutan janten menang. Sloka puniki kambil sakeng pustaka suci Mundaka Upanisad, III. 1. 6.
8. Bucu lima, marti; Pancasila miwah Panca Sradha , manut sekadi patitis miwah pamikukuh Desa Adat Singakerta.
9. Dasar Warna Putih, marti : ritatkala i krama nyangra Desa Adat Singakerta puniki antuk pakayun lascarya miwah suci.

MURDHA CITTA

AUM OM

OM Suastyastu, OM Awighnamastu Nama Siddham.

Putusing Sabha Krama Desa Adat Singakerta , gumawe Awig-Awig Desa Adat, maka sepat siku-siku pamatut, wastu kasidhan prayo janan mami kabeh prasama angidep mwah amagehaken kadi linging Awig-Awig iki.

SARGA I

ARAN LAN WEWIDANGAN DESA

Pawos 1

- (1). Desa Adat puniki mewasta Desa Adat Singakerta.
- (2). Jebar kakuwub wewidangannya mewates nyatur :
 - a. Siki Wetan , ring Tukad Oos .
 - b. Sisi Kidul , ring Tukad Siap-siapan.
 - c. Sisi Kulon , ring telabah Dauh Desa Tebenan.
 - d. Sisi Lor , ring Subak Mandi Let.
- (3). Desa Adat Singakerta puniki kaawangun antuk karang ayahan Desa utawi karang gunakaya, tur kapah dados 6 (nemnem) Banjar luire :
 - a. Banjar Jukutpaku.
 - b. Banjar Danginlabak.
 - c. Banjar Tengah
 - d. Banjar Dauhlalak.
 - e. Banjar Lobong
 - f. Banjar Katiklantang.

Pawos 2.

- (1) Kakuwub wewidangan Desane, manut dresta luire :
 - a. Pupulan karang paumahan, sinanggeh palemahan Desa Adat Adat.
 - b. Setra, sawah muah tegal ring kakuwub wewidangan Desa sajabaning palemahan Desa Adat manggah telajakan Desa.
- (2) Wates wewidangan palemahan Banjare kemanggehang antuk pamutus paruman Desane.
- (3) Anut ring munjuklungsur cacah jiwa pawongan pah-pahan Banjar rauhing wates wewidangan wenang karobah manut paruman Desa.

Pawos 3.

- (1) Banjare wewenang ngardi perarem-perarem maka pamikukuh pamargi Awig-Awig.
- (2) Pararem-pararem Bnajare tan wenang lempas ring Awig-Awig Desa Adat, saha taler kalingga tangani olih Bandesa Adat, maka pamikukuh dumugi dados lumaksana.
- (3) Banjare patut madue piranti-piranti, pamekasnya Bale Banjar miwah kulkul saha ilikita-ilikita.

SARGA II

PATITIS LAN PAMIKUKUH

Pawos 4

Desa Adat Singakerta ngemanggehang pamikukuh minakadi :

- a. Pancasila
- b. Undang-undang Dasar 1945, pamekas , pamekas pasal 18
- c. **Peraturan Daerah Provinsi Bali Nomor 4 Tahun 2019. Tentang Desa Adat.**

- d. Tri Hita Karana ,yang berakar dari kearifan lokal Sad Kerti, dengan dijiwai ajaran agama Hindu manut sadcara Agama Hindu dan nilainilai budaya serta kearifan lokal yang hidup di Bali.

Pawos 5.

Mungguing patitis Desa Adat Singakerta inggih punika :

- a. Pamikukuhin miwah ngrajegang Sanghyang Agama.
- b. Nginggilang tata prawertine maagama.
- c. Ngajegang kasukertan Desa saha pawongan sami sekala lan niskala.
- d. Najegan kasukertan saraja druwen Desa miwah druwen pawongannya sami.

SARGA III

SUKERTA TATA DESA ADAT

Palet 1

Indik Krama

Pawos 6

- (1) Krama Desa Adat Singakerta inggih punika :
- a. Krama inggih punika warga masyarakat sane meagama Hindu saha Mipil inggian tercatat dados krama Desa Adat. (saha ngamong karang Desa utawi karang gunakaya irika)
 - b. Krama sane maagama Hidu sane jumenek ring wewengkon Desa Adat saha lila mekrama.

(2) Krama Tamiu inggih punika :

Krama Tamiu inggih punika maagama Hindu sane jumenek ring wewengkon Desa Adat Singakerta ten Mipil sakewanten tercatat ring Desa Adat .

Sane kasinanggeh krama tamiu wenten kalih soroh :

- a. Krama sane jenek iriki ring Desa Adat Singakerta sane maagama Hindu sampun medue paumahan taler sampun tercatat.
- b. Krama sane jenek ring wewidangan Desa Adat Singakerta maagama sane tioasan taler madue paumahan wantah tercatat manten.

Pawos 7

(3) Tamiu inggih punika setios warga Desa Adat lan Krama tamiu sane jenek ajebos ring Desa Adat Singakerta taler sampun kecatat.

- a. Tamiu dura negara sane jenek megenah ring Desa Adat Singakerta saha sampun tegep pailikitannya ngananin indik tamiu sane ngalila cita.
- b. Tamiu boyo sakeng dura negara, wantah warga negara Indonesia, jenek ajebos ring Desa Adat Singakerta.

Pawos 8

(4) Kasukerta Desa Adat Singakerta.

- a. Warga sane nampi padunungan tamiu, patut atur supeksa ring prajuru, sekirang-kirangnya arahina ngawit padunung rika rauh.
- b. Selanturipun, Prajuru maritatas tur makelingang/ ngilikita yang kahanan tamiu punika mekadi tetujon nyane rauh tur magenah ring

Desa Adat Singakerta sampunika taler kanjakan matilar mangda atur supeksa ring Prajuru Desa.

- c. Sane nenten negepin pidabdab kadi ring ajeng nenten kalugrayang jenek sajabaning wenten ngawirang dados walan nyane.
- d. Sehananing tamiu mamgda nganutin yasa kertin Dasa.

Pawos 9

Krama Desa Adat Singakerta wenten 8 (kutus) soroh luire :

Krama pengarep Pawos 10

- 1. inggih punika krama sane ngamong karang.
Ayahan desa utawi karang guna kaya.
- 2. Krama Pengampel, inggih punika krama sane kakuubang olih krama ngarep.
- 3. Krama Balu, inggih punika krama pengarep sane katinggalin seda olih lanang / istrinyane utawi sangkanin nyapian.
- 4. Krama ubuh, inggih punika krama sane katinggalin seda olih reraman nyane kalih.
- 5. Krama Tapukan, inggih punika krama sane ubuh, tur dereng antes ngayah (durung mayusa 17 tiban) utami selami kantun masokolah, manut ilikita pastika sakeng sakolahnya.
- 6. Krama Roban, inggih punika krama sane truna truni wiadin para alit-alit

Utawi krama tioyosan sane kaundul olih sinalih tunggil krama Desa.

7 Krama kuwuban, inggih punika krama pengampel utawi daa truna sane magenah ring dura desa, nanging kantun kaundulang olih krama Desa.

- 8. Krama Panyade, inggih punika krama lanang sane merabian pinih riin.

Pawos 10

Kawit Tedun dados krama Desa, minakadi :

- a. Wit ngamong karang ayahan Desa utawi karang guna kaya.
- b. Sang ngenahin karang gunakaya dados ayah pengarep, pada sampun madue margi, angkul – angkul parhyangan. Ngawit tedun ngayah awarsa sakeng ngulin karang.
- c. Sang maagama Hindu mawiwit sakeng tios desa jumenek mapaumahan ring Desa Adat Singakerta patut tedun makraama suka duka nganin makrama Desa Adat manut suka lilannyane.

Pawos 11

Panumaya

tedun makrama :

- a. Krama Pengarep/Penyade ngelantur pramangkin.
- b. Pengampel polih sengker awarsa sakeng pawiwahan nyane.
- c. Tamiu sane maagama Hindu saha lila makrama, sesampun masengker awarsa dados makrama sepatute, keni pamogpog manut perarem.

Pawos 12

(1) Sehanan krama Desa keni tetegenan (ayah-ayahan muah pedagingan) manut kadi ring sor puniki :

- a. Ayah Pengarep / Penyade, keni ayahaan miwah urunan mamungkul
- b. AyahPengampel, keni ayahan manut perarem, uruna separo sakeng krama pengarep.

- c. Ayah Balu :
 - 1. Balu Ngarep , ayah manut kebaluannyane, urunan mamungkul.
 - 2. Balu Ngampel, kaundul olih krama marep . prasida sampun madue pratisantana sampun mawiwaha mewali dados krama pengampel, wusan kaundul.
 - d. Ayah Ubuh, ngamong karang ayah tan keni sadurung antes ngayah utawi sedurung mawiwaha, urunan mamungkul.
 - e. Ayah Tapukan, Roban, kuwuban, manut perarem miwah manut wiguna.
- (2) Prada rikalaning ngayah wenten krama matilar sedereng puput karya, paruman wiadin sapanunggilannya (tan pasadok) wenang krama inucap keni pamidanda manut perarem tanjek laler, ngaran.

Pawos 13

Pituas utawi olih-olihan krama Desa :

- a. Sehananing krama Desa wenang maoli pasayuban Desa, ngamanggehan kasukertan raga, padruwennya saha agama.
- b. Sehananing krama Desa wenang maolihang pengayom peparem peparem , nganinang :
 - 1. Pengaskara kauripannya sane mabuat, mastikayang paikatan sulur kauripan pakulawargannyane.
 - 2. Kasukertan kasucian raga miwah karang nyane soang-soang.
 - 3. Kasukertan druwen nyane soan-soang.
 - 4. Sehanan wicaranya kabawosin tur katiwakin pamutus.

Pawos 14.

Krama Desa kadadosang.

- a. Mapuankid utawi tan tedun :
 1. Rikala mapawangun, mayadnya, matepetin, manut perarem.
 2. Dados wantah apisan, sajawaning wenten wakan saking Prajuru Desa.
- b. Nyada mapiteges risampun mayusa 70 warsa utawi lintang, tan dados nyusukin tur patut digelis magontos ayah. Sajabaning sane kajudi antuk Desa utawi Banjar.
- c. Nyade utawi nyusukin, mapiteges sane kawenangan nyusukin ring sampun ring sampun mayusa 17 (pitulas) warsa (daa truna) utawi sampun alaki rabi tur mrasidayang nganutin krama.
- d. Dosa ayah, kadadosang wantah ping kalih, langkungan ring punika katikelang.
- e. Naub/Mogpog, sangkaning megenah ring dura Desa manut perarem, krama pengarep patut ngenahang ayah penyaledi.

Pawos 15

Swadharmaning krama Desa miwah tamiu :

- (1) Krama Desa patut tinut saturut ring daging Awig-awig Pararem miwah pasuaran Desa utawi Banjar.
- (2) Krama Desa patut nyarengin yasa kartin Desa lan dreda atuang ring Guru wisesa.

- (3) Tamiu tinut saturut ring daging Awig-awig, Pararem miwah Pasuaran Desa, tur tan wenang tulak ring sapamargin kasukertan Desane.

Pawos 16

Jadma sane karobang sami tios linggih nyane luire :

- a. Wong duduk – dudukan.
- b. Samoton budal saking maparabian.
- c. Sameton budal saking transmigrasi.
- d. Jadma ngaturang sikian.
- e. Ruang pastika jenek, wiadin sane tiosan.

Pawos 17

- (1) Krama sane ngerobang patut wenten atur piuninga ring kelian Banjar utawi Desa.
- (2) Pisadok inucap patut kadulurin antuk keterangan pastika nganinin linggih, artha brana miwah bebaktian tiosan.
- (3) Krama sane ngerobang patut tanggung samakuta negenang lampah laku sang kaajak inucap marep ring kasukertan Desa.
- (4) Kelian Banjar utawi Desa patut ngunggahan pasadok inucap ring ilikita saha nyobyahang ring paruman Desa.
- (5) Jadma sane karobang inucap wonang polih pesayuban krama Desa, yan mamurug ring Awig-awig Desa Adat wenang danda manut perarem. Bilih kaiwangannya mabuat patut katur ring sang Mawang Rat.

- (6) Krama sane transmigrasi, bilih nanggap karang ayahan Desa, karang punika patut kaserahang ring waris nyane dumun, bilih ten wenten warisnya, wawu karang Desa inucap kesangra antuk Desa utawi Banjar.
- (7) Krama sane mewali sakeng transmigrasi tur jagi jenek malih ring Desane, patut masadok ring Kelian Banjar utawi Desa. Kelian patut tureksa tur netes maka buatannya mawali, tur mangda nyinahang antuk swalapatra keterangan pastika sane kasinanggeh putus jadma punika wenang ngranjing mekrama malih sekadi ayah pangampel, sadurung prasida makarya utawi madue karang paumahan.
- (8) Bilih wenten jadma sane ngaturan dewek, krama sane nampi patut tureksa ring jadma inucap, bilih-bilih jadma punika nenten janten sulurne utawi jadma durjana. Yan sampun janten jadma inucap jadma becik-becik, krama sane nampi patut masadok ring Prajuru Desa saha sregep swalapatra keterangan saha pastika putus. Kelihan Banjar utawi Desa wenang ngicenin pesayuban tur ngunggahang ring ilikita Desane. Indik inucap patut kasobyahang ring krama Desa sajroning paruman Desane kapungkur. Bilih nenten janten sulurnya krama punika ten dados nampi jadma punika.
- (9) Yan wenten roang pastika jagi jenek ring desane tur sampun prasida maparabian, roang inucap patut ketedunang makrama manut perarem.

Pawos 18

Indik Leluputan ring Prajuru Desa :

- a. Desa miwah Banjar maweh leluputan ayah utawi pakenan-kenan ring sang kainggilang linggih utawi sang kawelas asih.

- b. Sor singgih leluputan miwah bacakan sang luput kaunggahaan ring ilikita pararem Desa utawi Banjar.
- c. Sajabaning Prajuru Desa, sane pastika patut polih leluputan pamekasnyane :
 - 1. Para Sadaka
 - 2. Para Pemangki Khayangan Tiga
 - 3. Para Pemangku Manca
 - 4. Sang Sakit tahunan
 - 5. Wong ali ubuh
 - 6. Wong cendaka banget
 - 7. Prajuru subak, Hansip, Sonteng.
- d. Tukang banten Banjar polih luput pepeson daging setengah.

Pawos 19

Wusan dados krama Desa, luire :

- a. Sangkaning :
 - 1. Pinunas ngraga, kesah ka dura utawi transmigrasi
 - 2. Kanorayang, doaning sampun tan prasida ngehehin solah maprewerti setate mamurug Awig-awig.
 - 3. Sampun tan maagama hindu malih
- b. Sang wusan mekrama :
 - 1. Patut ngaturang karang ayahan ka Desa prada karang punika karang Desa.
 - 2. Tan polih pah-pahan sankaaning padruwen Desa.

3. Pasuk wetu makrama patut atur speksa ring Prajuru Desa tur keni pamлага. Yan sampun seda keni penanjung batu, manut perarem.
4. Sang mamurug patut kadanda manut perarem.
5. Sang wusan sangkaning kanorayang prada mewali malih makrama patut muntasang saluir pamidandannya utawi tetegenan sane ngeranayang kanorayang madulurang penyangaskara manut perarem.

Palet 2

Indik Prajuru Desa

Pawos 20

- (1) Desa Adat Singakerta kaenter olih Bandesa Adat.
- (2) Banjar kaenter olih Kelihan Banjar.
- (3) Bandesa Adat lan Kelihan Banjar, patut :
 - a. Mawiwit saking krama wed
 - b. Mawiwit saking krama ngarep.
 - c. Kaadegan melarapan antuk gilihan/kacatri ring paruman nyabran
5 warsa, sajabaning wenten pariindikan tios, tur dados catri malih
 - d. Maduluran Dewa Saksi ring pura Balai Agung.

Pawos 21

- (1) Bandesa Adat kasangga olih :
 - a. Petajuh utawi Pangliman pinaka panyadenya.
 - b. Penyarikan Pinaka juru surat
 - c. Petengen pinaaka pangemong druwen Desa
 - d. Kasinoman pinaka juru arah.

- e. Sinoman prantenan pinaka juru rateng ritatkala karya piodalan ring khayangan.
 - f. Panggala Desa pinaka penyangga Prajuru
- (2) Kasinoman akeh miwah wewenangny manut pararem.
 - (3) Sinoman prantenan akeh nyane lan gilirannya manut wiguna tur manut pararem.
 - (4) Sajroning ngenterang kasukertan niskala, Bandesa Adat patut misinggihang Pemangku khayangan Desa utawi sang rumaga sulinggih.

Pawos 22

- (1) Swadharmaning Bandesa Adat, luire :
 - a. Ngenterang sehanan pamargi sedaging Awig-Awig miwah pararem Desa.
 - b. Ngentrang paruman-paruman Desa
 - c. Nuntun tur ngenterang krama rauhing warga Desa
 - d. Nuntun saha nyaksinin tata cara sangaskaraning kauripan sane ngelintang sulur pakulawargan.
 - e. Mawosin miwah niwakang pamutus arep ring wicara warga Desa
 - f. Maka duta Desa matemuang bawos ring sapa sira ugi
 - g. Nuntun ngennterang Panca Yadnya miwas sane tiosan.
- (2) Tata caraning nglaksanayang suwardhamaning ring ajeng, ten maren patut anut ring Awig-Awaig, paraarem miwah pasuaran Desa.
- (3) Pararem Desa patut segelis kasobyahang mangda krama Desa utawi Banjar tatas uninge.

- (4) Prada Prajuru iwang panglaksana, keni pamidanda nikel ring kaiwangan soang-soang krama, saha dados karariang manut pararem.

Pawos 23

Patias utawi olih-olihan Prajuru Desa, luire :

- a. Luput rerampen (papeson).
- b. Polih tanding tengah
- c. Patias tiosan manut pararem.

Pawos 24

(1) Prajuru Desa kagontosain, riantukan :

- a. Seda
- b. Kanoroyang, dwaning iwang pamargi utawi nilar sesana.
- c. Wit saking kayun rahayu, pinunas ngraga.

Pawos 25

Indik kasucian utawi kasukertan Desa Adat :

- a. Bandesa Adat tan maren nuntun 1 krama mangda kacucian miwah kasukerta Desane prasida ajeg.
- b. Sane patut katitenin oleh Bandesa Adat sahanan pemargine numpang laku, sane kasinanggeh duskreta miwah ngeletehin Desa, upami :
 - 1. Sang dura cara ring Agama.
 - 2. Salah timpal, jadma masenggama sareng sato.
 - 3. Gamyagamana sane katalanjur.

4. Panguman-uma ring shaba.
 5. Miwah sehanan sane ngsletehin manut kadi linging Agama.
- c. Sang sapasira ugi kasinahang malaksana kadi ring ajeng patut kasisipang manut peraraem.

Pawos 26

- (1) Prajuru Desa patut nuntun/nitenin mangda sehanan upacaara sane ngemargiang olih krama Desa kamanggehang manut kawentenannya nista, madhya, utama.
- (2) Prada wenten cihna kadurmanggalan jagat, Prajuru Desane digelis ngutsahayang pamarisudhan jagat antuk nunasang ring sang sulinggih.
- (3) Sewosan sekadi ring ajeng prajuru desa patut taler nuntun ikrama mangda atuang nginutin daging awig-Awig Adate.

Palet 3

Indik Kul-kul Pawos

27.

- (1) Kulkul ring desa luire :
 - a. Kulkul Desa
 - b. Kulkul Banjar
 - c. Kulkul Sekaa- Sekaan.
- (2) Tabuh tetepakan kulkul Desa utawi Banjar, sekadi ring Sor :
 - a. Upeti.
Embas putra :
 1. Lanang ; sakadi kulkul bedil nungtit ping 10

2. Istri ; sakadi kulkul bedil nungtit ping 5

b. Sthiti :

1. Bhaya :

- Gni Bhaya ; bulus a tulud
 - Kapandungan ; bulus duang tulud
 - Kaicalan ; bulus a tulud ngalantur banban
 - Parabian utawi ngarorod;
1. Tunggal bebanjaran ; 10 (dasa) klentungan lambat.
 2. Tios Bebanjaran utawi Desa ; 20 (kalih dasa) klentungan lambat.
 - Anak ngamuk, kabegal utawi bhaya pati tiosan ; bulus tigang tulud.
 3. Tedun makarya manut pararem Banajar soang-soang.
 4. Ngawangdeang makarya ; 3 (tigang) klentungan ngempang.
 5. Rikala Pujawali, Surya Gra, Bulan Kapangan ; nungtit (kulkul bedil).

c. Pralina :

Kelayu sekaran (seda) :

1. Lanang ; 5 (limang) klentungan tabuh ping 3 (telu)
2. Istri ; 3 (telu) (telung) klentungan tabuh ping 3 (telu)

Pawos 28

- (1) Kulkul Desa utawi Banjar patut kapingitang olih krama Desa utawi Bnajar maka sami.

- (2) Kulkul Desa utawi Banjar tan wenang katepak bilih tan molihang wakan saking Prajuru Desa utawi Banjar, sajawaning tengeran bhaya.
- (3) Sang nepak sangkaning pituduh Prajuru Desa patut segelis atur supeksa maka buatan panepakan, yan ten asampun nika, wenang sang mamurug kadanda manut pararem.
- (4) Kulkul sekaa-sekaan miwah kulkul pondokan tan kalugra matehinsukat utawi tengeran kulkul Desa utawi Banjar, sajabaning tengeran bhaya, prada mamurug wenang kadanda manut pararem.
- (5) Tengeran bhaya desa sewosan kasawurin.
- (6) Tengeran bhaya patut katedunin olih krama Desa utawi Banjar matulung saha makta gegawan (piranti) manut tengeran suaran kulkul.
- (7) Parajuru Desane patut nyobyahang indik danging tengeran kulkul Desa utawi Banjar ring krama Banjarnya soang-soang mangda pastika uning tur patut ketinutin.
- (8) Prade wenten sinalih tunggil krama Desa utawi Banjar sane memurug wenang kadanda manut pararem.

Palet 4

Indik Paruman Pawos

29.

- (1) Paruman utawi sangkepan ring Desa, luire :
 - a. Paruman Desa utawi Banjar, kawentenang :
 1. Nyabran asasih.
 2. Napkala (pagata kala) manut tetujon.
 - b. Saangkepan Prajuru Desa, nyabran asasih kawentenan taler manut wiguna.

- c. Paruman sekaa-sekaan manut pabuat.
- (2) Paruman Desa utawi Banjar madudonan sekadi ring sor :
- a. Prasida lumaksana ri sampun katedunan olih sang patut ngamiletin, kamanggala antuk tengeran kulkul, miwah mabusana adat madya, saha tan kalugra makta gegawan sakaluire.
Tan maren mangarcana ring Ida Bhagawan Panyarikan maka sarana Widhiwidhana Cane.
 - b. Pangawit kalaksanayang panyakcak sepsepan, nyakcak dadosan gung alit manut pararem.
 - c. Tan kalugra ngawetuang suara ghora utawi byuta. Yening wenten asampunnika keni pamidanda bya pacamil kadi dandaning nguman-uman ring sabha.
 - d. Pamutus paruman gilik saguluk, prada tan prasida, suara sane makehan kasinanggeh pamutus.
- (3) Prasida pidaging paruman tan kaingkupin, mangda prajuru Desa ngilikan bebaos, saha pamutusnyane mangda kararemin olih krama Desa, bilih tan prasida kasungkemin jantos ping 3 (tiga) , Prajuru Desa wenang nunas baos ring Sang Ngawa Wenang.

Pawos 30

- (1) Paruman Desa Adat kawentenang ritatkala wenten rencana pawangunan utawi karya agung.
- (2) Nangken paruman kadi ring ajeng Bandesa Adat patut nyobyahan pamarginya ngenterang Desane, pamekas nganinin indik :

- a. Munjuk lungsuring pakraman miwah ayah-ayahan.
 - b. Pamargi, panelas miwah sulur artha brana padruwen Desa.
 - c. Pamargi usaha-utsaha Desa sane mabuat.
 - d. Sahanan wicara sahapamutusnya.
 - e. Daging pararem miwah pasuara sane mabuat.
 - f. Rencana Prajuru nganinin usaha kartin Desane kapungkur.
 - g. Miwah sane sewos-sewosan.
- (3) Daging pararem miwah pasuara tan maren patut :
- a. Saeloan ring daging Awig-Awig.
 - b. Manut ring Catur Dresta melarapan melarapan sastra Agama Hindu.
 - c. Pastika nyantenang dewasa pengawit pemarginnya.
 - d. Nyantenang agung alit dandannyane yang kapurug.
- (4) Sahananin pasobyah ring ajeng sinanggeh sepat siku-siku prada sampun kasungkemin olih krama Desane sami pamekas olih prajurune.

Pawos 31

Paruman

Prajuru :

- a. Paruman Prajuru Desane kawntenang nangken piodalan ring pura utawi galahe sane sampun katetepang.
- b. Paruman inucap katutun olih Bandesa Adat.
- c. Sahanan Prajuru Desane patut nyarengan paruman prajuru.
- d. Pamutus paruman prajuru Desane wantah sinanggeh pangawisesa sane patut nyelem putihang tata pengenter Desa manut wiguna.

- e. Prajuru Desane wenang ngemedalang pasuara maka pidaging piduduh sang ngawa wenang utawi ngonekangpecak perarem krama Desa

Palet 5

Indik Paruman Desa Pawos

32.

Padruwen Desa Adat Singekerta, sekadi ring sor :

a. Kayangan Desa luire :

1. Khayangan Tiga ; Pura Desa , Pura Puseh , Pura Dalem.
2. Pura Ambara Sari , Mas Maketel.
3. Pura Gegaduhan jagat.
4. Pura Penataran Agung.
5. Pura Prajapati.
6. Pura Tirtha.

b. Pura-pura Melanting.

c. Telajakan Pura

d. Bale Wantilan utawi Bale Banjar.

e. Plaba Pura manut ilikita.

f. Karang ayahan Desa

g. Setra.

h. Lelanguan, minakadi :

1. Gong 6 (limang) barung , druwen Banjar Jukutpaku, Danginlabak, Lobong, Katiklantang.
2. Angklung abarung, druwen Banjar Tengah.
3. Batel abarung, druwen Ratu Alit.

4. Ilen-ilan wali ; Rejang , Pendet lan sapanungilannya.

5. Sasuhunan marupa :

- Barong 4 (patpat).
- Rangda 6 (enem).
- Barong Landung apasang
- Barong kadingkling
- Pratima-pratima lan uperengga Pura.

i. Miwah padruwen Desa sane sewosan.

Pawos 33

Pioli-pioli Desa Adat Singakerta, luire :

- a. Urunan saking krama Desa
- b. Paica saking Guru Wesesa
- c. Paica-paica sane tiosan sane patut.
- d. Dana punia.
- e. Pioli- olihan druwen Desa.
- f. Usaha Desa

Pawos 34

- (1) Prajuru Desa wenang ngetangan pamupon laba Pura lan sapanunggilan druwen Desa.
- (2) Pikoli lan pamupon nyane keanggen prabeya piodalan miwah pawangunan ring Pura.

- (3) Nyabran pesangkepan Desa, Prajuru pangemong druwen Desa nyobyahangparindikan munjuk lungsuring padruwen krama Desa.
- (4) Sakaluiring druwen desa muah Banjar, patut wenten ilikitannyane.
- (5) Tan kalugra ngadol, nyandayang utawi ngesahang padruwen Desa, yanten kasunkemin olih krama Desa.

Palet 6

Indik Sukertan Pamitegep

Kaping 1

Karang Tegal lan Carik

Pawos 35

- (1) Karang ayahan wenten kalih soroh inggih punika :
 - a. Karang ayahan Desa, inggih punika karang ayahan sane Kawehin olih Desa Adat, kaanggen karang paumahan lan teba.
 - b. Karang ayahan gunakaya, inggih punika karang paumahan krama adat sane kadruwenyang mabantang antuk numbas ngidihutawi tetadtadan.
- (2) Karama sane ngamong karang ayahan, carik utawi tegalan patut ngawatesin karang inucap antuk tembok utawi pagehan, carik utawi tegalan inucap antuk pagehan utawi pundukan. Wates karang sisi kaler lan kangin kapiara olih sang ngamong karang inucap, rih punika mewasta magaleng ka luan. Carik utawi tegal sane kapiara watesnyane manut dresta.
- (3) Yan wates winucap marupa pagehan tan dados langkungan ring 2 (kalih) meter tegehnyane.
- (4) Prada wates inucap ngalikadin, yening pada arsa anut pangunandika, kangin wates punika nganggen pinget kimaon.

- (5) Yening wenten karang kabebeng utawi embet kautsahayang pamarginya manut paigum lan pararem.

Pawos 37

- (1) Sinalih tunggil krama Desa utawi Banjar miwah wong tiosam sane magenah ring wewongkon Desa Adat Singakerta tan kalugra :
- a. Ngalalaah tanah karang, plaba Pura, margi, tegal lan carik.
 - b. Ngalalah linggih khayangan, tegak setra lan sapanunggilan ipun.
 - c. Ngadol, nyilurang, ngadeang miwah ngangge wala karang ayahan Desa.
 - d. Ngererehang sertipikat nadosan druwe ngraga utawi sapisira ugi karang ayahan Desa wiadin tanah druwen Desa.
 - e. Ngembakan toya wit saking badan wewalungan, toyan kakus utawi toyan pasiraman, toya wit saking pawaregan miwah sane tiosan ka pakarangan utawi ka paumahan anak tiosan, ka margine wiadin ka tukade utawi tlabah sane kaanggen olih krama masiram wiadin ngrereh toya ka anggen ring pawaregan wiadin tetedan wewalungan.
 - f. Ngutang mis usaha, minakadi industri, bingkil miwah sane tiosan ka tukade utawi ka tlabah sekadi ring ajeng
 - g. Ngentungan wangke wewalungan, leluu lan leluu barang pecah belah ka pakarangan krama tiosan, ka tukade, ka marginne, bilih bilih genah sane kasucuang.
 - h. Ngutang luu, luun caru utawi sesajen tiosan ring margi, pempatan, sang makutangan patut ngeseng utawi mendem luu inucap sejroning arahina.
 - i. Nyemuh penganggo, kekerang pantun, cacah muah sane tiosan ring margi, ambal-ambal muah ring genah sane kasinanggeh suci.

- j. Nanem utawi nunjel sawa utawi awak-awakan sawa ring karang paumahan, tegal miwah carik , sejawaning sang meraga sulinggih.
- (2) Prade wenten pelaksanan krama Desane utawi wong tiosan sekadi ring ajeng, sang melaksana patut ngewaliang sekadi sane sampun turmaning kakenain pamidanda manut perarem muah yening nganinin genah sane kasinanggeh suci patut kadilurin pamrayascita manut sastra Agama.
- (3) Yaning wenten sinalih tunggil Krama Desa Adat sane ngamong karang ayahan Desa, wus dados krama Desa, karang inucap patut kewaliang ka Desa Adat, tur olih Desa Adat dados kaicen krama sane tiosan, mangda ka anggen karang paumahan tur ngayah sekadi krama sane tiosan.
- (4) Yening krama Desa Adat sane madruwe karang ayahan, antuk gunakaya, wusan dados krama Desa, karang ipun manggeh kantun druwen krama inucap.

Kaping 2

P e p a y o n a n

Pawos 38.

- (1) Ngawit nandur pepayonan utawi tanem tuwuh adepa agung, kirang langkung 2,5 (kalih tengah) meter ngajrowang saking wates, prade nyantos liwat wates wenang kasepat gantungin.
- (2) Yening wenten tetanduran ngungkulin, semaliha mayanin kapisaga patut kwara antuk paiguman pingajeng mandane prasida sang nruwenang wit netor utawi ngebah.
- (3) Prada sampun kwara taler ten wenten usaha sang nruwenang, sang kaungulin wenang mesadok ring Prajuru Desa. Risampun kaparitasas, wenang keni pamidanda manut panglokika miwah perarem.

- (4) Yan wenten pepayonan ngrubuhin wewangunan umah utawi Pura, keni prabeya panyangaskara manut pararem.
- (5) Yan wenten krama munggul utawi ngebah taru tur ngrubuhin wewangunan krama tiosan , utawi genah suci taler keni prabeya kerubuhan miwah upacara panyangaskara manut pararem.
- (6) Krama Desa patut ngamggehang ngawerdiang tanem tuwuh sane wenten iketan ipun ring piranti yadnya, miwah tanem tuwuh tiosan sane ngawinang Desane asri.

Kaping 3
W e w a n g u n a n
Pawos 39.

- (1) Nyabran wewangun patut :
 - a. Masadok ring Prajuru Desa utawi Banjar, bilih-bilih prada wewangunan nganinin wates.
 - b. Ngangge sukat asta bhumi miwah gegulak AstaKosala kosali sanistanya manut ring patitis niskala
 - c. Tan nyayubin ka pisaga.
- (2) Prade wewangunan jantos nyayubin, bilih-bilih temboke ring telengin wates, risampun kawara tur kesadokang ring Prajuru Desa utawi Banjar, wenang kadanda manut pararem. Saha tembok inucap kagubar utawi sanistanya mangda kakaryanang abangan.
- (3) Prada ngewangun ring tepin wates patut ngawentenang paiguman ring panyandingnya tur kasadokan ring Prajuru mangda saksinnyane.

- (4) Ngewangun ring tepin wates manda wenten paembang 3 (tigang) tapak lan angandang saking wates.
- (5) Yening wewangunang ring tepi wates khayangan jagat mangda wenten paembang sanistanya adepa agung kirang langkung 2,5 (kalih tengah) meter, sajawaning wenten wates margi utawi rurung tur tan kalugra ngenahang wewangunan sane kaanggen nglaksanayang karya sane kabawos romon.
- (6) Yaning wenten jagi ngawangun wangunan masusun tan kalugra nyayubin Parahyangan Panyandingnya utawi prahyangan jagat, bilihbilih ngenahaang genah kamar mandi utawi kakus wiadin majemuhan busana ring baduwur.

Kaping 4
Wewalungan
Pawos 40

- (1) Sahanan warga Desa sane miara sakaluiring wewalungan patut sayaga nitenin negul utawi nglogorin mangda tan ngrusakin karang utawi abian krama tiosan, bilih-bilih mangda sampunang jantos ngranjing utawi ngletehin khayangan.
- (2) Prade wenten wewalungan nglana saha ngranjing ka karang tiosan , sang madue karang patut malungguang ring sang nruwenang. Bilihbilih yen wenten karusak kadulurin antuk nunasang baos ring Prajuru mangda katiwakin pamidanda agung alit manut dosannyane.
- (3) Bilih ring asasihe ngantos ping 3 (tiga) sampun malungguang wewalungan inucap, wenang kataban. Tetaban punika patut uningan ring Prajuru.

- (4) Wewalungan inucap wenang katebus olih sang nruwenang, agung alit penebus katiwakan olih kelian Banjar, kadulurin danda manut karusakan miwah papeliharan.
- (5) Bilih asasihe ngantos ping 3 (tigang) mataban kadi ring ajeng, wewalungan wenang kambil tan dados tebusin ka saksinin olih Prajuru miwah krama 3 (tigang) diri Pemargi naban punika malarapan antuk pituduh kelian Banjare.
- (6) Prade wewalungan sane ngeleb ngrsnjing ka kahyangan, sane maduwe wewalungan punika patut katiwakin pamidanda prabeyaning upacara parisudhan sepatuta manut pararem.
- (7) Krama Desa patut nyangra wewalungan sarwa prani, tan kapatut ngamademang paksi utawi nuba ulam, miwah sane tiosan. Yan wenten masurug keni pamidanda manut pararem, tur sang malaksana patut kaaturang ring sang Ngawa Wenang.

Kaping 5

B h a y a

Pawos 41

- (1) Sane kasinanggeh bhaya utawi penangkan bhaya sakaluire :
 - a. Jiwa bhaya, kastha bhaya, kapa ngawan
 - b. Artha bhaya
 - c. Gni bhaya
 - d. Kapalagandang
 - e. Duracara ring Agama.
- (2) Sahananing warga Desa prade uning ring kawentenang bhaya, utawi dusta, patut praamangkin masadok ring Prajuru Desa.

- (3) Bilih mabuat kawentenan ipun sang uning inucap patut digelis nyuarayang kulkul Banjar manut ring rupan panglaksanaan dustane.

Pawos 42

- (1) Warga Desa sane kaicalan utawin kemalingan , prada pacang maserep, patut nunas pamutus miwah panuntun ring kelian Banjar.
- (2) Prade genahe maseserep, patut nunas pamutus miwah panuntun ring kelian Banjar.
- (3) Sahananing warga Desa prada polih nuduk barang, utamanya sane kasinanggeh suci, patut masadok ring kelian Banjar.
- (4) Kelian Banjar inucap patut nyobyahan barang dedudukan punika mangda sang madruwe sida mawantun ngamolihang barang nyane.
Sang mariangkenin patut prasida nyatiang utawi ninasang, mungguing barang punika gumanti wantah barang padruwenyane.
- (5) Prade jantos tigang sasih ten wenten sane ngelingan, wenang kdruwen antuk sang nuduk.
- (6) Pratingkahe mapailon ring dusta kabaos saruron, prade wenten jadma ngemanggihin maling, tan nyadokang ring Prajuru Desa, jantos jadma tios nyaduang, patut kadanda kadi dandaning maling, sakueh pangargan wit nikel ping 5 (lima), tur yan prade jantos ping 3 (tiga) malaksanakan asampun wenang kasukserah ring San,g Ngawa Wenang.
- (7) Prade wnten jadma ngarereh reramon, minakadi daun kelapa ron miwah sane tiosan, tan pasadok ring sang sane nruwenang wit, prade ketara patut kadadnde kadi dandaning maling.

- (8) Prade wenten jadma ngranjing ka pakubon wiadin pakarangan anak tiosan ritatkala suwung, mawastu sang mdruwe karang kaicalan, wenang jadma inucap katuwekan antuk madewa saksi ring Pura Bale Agung.
- (9) Katiban ulu, inggih punika anak sane kapisunayang antuk barang malingan olih anak tiosan. Mangda wenten kabawos katiban ulu melarapan antuk madewa saksi ring Pura Bale Agung. Yan sampun kauningan anak sane ngenahang, kadanda manut dandaning maling.

Kaping 6

Penyangran Banjar

Pawos 43.

Krama Desa rikali ngawentenang karya suk duka, dados kesangra olih Banjar, luire :

- a. Prade ngewangun Pitra Yadnya utawi Manusa Yadnya miwah yadnya sane tiosan, manut pinunas sang meyadnya.
- b. Sahanan krama Desa sane pacang nguwangun yadnya pacang nunas penyanggran Banjar patut atur uninge ring Prajuru Desa manut agung alit pekaryane.
- c. Pangrombo utawi karya gotong royong krama ping tiga, langkungan ring punika patut katurang pangu manut perarem.
- d. Pangu ritatkala Pitra Yadnya anut abot dangan yadnyane.
- e. Pakaryan gotong royong patut katedunin olih krama sinamian rauhin pengampel.

SARGA IV

SUKERTA TATA AGAMA

Palet 1

Indik Dewa Yadnya

Pawos 44

(1) Khayangan sane wenten ring Desa Adat Singakerta, wenten 3 (tiga) seroh luire :

a. Khayangan Tiga, minakadi :

1. Pura Desa Bale Agung
2. Pura Puseh
3. Pura Dalem/ Prajapati.

b. Pura Dang Khayangan Desa, minakadi :

1. Pura Amabara sari
2. Pura Mas Maketel
3. Pura Gegaduhan Jagat
4. Pura Penanataran gung
5. Pura Tirtha

c. Pura Melanting :

d. Pura Pepantian utawi Pamaksan :

(2) Rahina piodalan Pura inucap ring ajeng, sekadi ring sor :

a. Pura desa/ Bale Agung ring Purnama Kadasa.

b. Pura Puseh ring purnama kapat.

c. Pura Dalem Prajapati, ring rahina Anggara Kliwon Tambir.

d. Pura Ambara Sari, Pura Mas Maketel, ring rahina : Purnama Jyestha.

e. Pura Gegaduhan Jagat, ring rahina ; Buda Wage Klawu.

f. Pura Penataran Agung, ring rahina ; Anggran Kliwon Medangsia.

g. Pura Tirtha, ring rahina ; Anggaran kliwon Klantir.

- h. Ratu Alit Ratu Lingsir, ring rahina ; Saniscara Kliwon Waayang.
 - i. Ratu Gede, ring rahina ; Anggara Kliwon Prangbakat.
- (3) Pengaci ring Pura inucap manut kecap sastra Agama , saha kalaksanayang nista, madya utama nganutan kawentenan lan pararem.
- (4) Pangempon soang-soang Pura manut dresta kadi ring sor :
- a. Pura Desa/ Bale Agung ,Puseh Dalem kaompom olih Desa Adat Singakerta tur dados kagilir manut pararem.
 - b. Pura Ambara Sari , Mas Maketel , kaempon olih Banjar lobong miwah Katiklantang.
 - c. Pura Gegaduhan Jagat, kaempon olih Banjar Dauh Labak, Tengah miwah Danginlabak.
 - d. Pura Penataran Agung, kaempon olih ; Banjar Jukutpaku.
 - e. Pura Tirtha, kaempon olih krama subak.
 - f. Ratu Alit Ratu Lingsir, kaempon olih ; Banjar Dauhlabak.
Tengah miwah Danginlabak.
 - g. Ratu Gede kaempon olih Banjar Jukutpaku.
- (5) Bandesa Adat utawi Prajuru Desa patut nuntun ngenterang krama Desane ngamanggehang kasucian khayangan inucap.

Pawos 45

- (1) Ring soang-soang Pura inucap patut kaadegang Pamangku
- (2) Ngadegang Pamangku manut dudonan :
 - a. Turunan utawi ngawarisan.
 - b. Nyanjan utawi masembuang, soang-soang mapiteges mapinunas ring Pura wiadin ka dura Desa utawi ring balian sonteng.

- c. Kacatri utawi kagilih olih krama Desa.
- (3) Tan kawenang kanggen Pamangku, luire :
- a. Cedangga ; perot, cungh miwah sapanunggilanya.
 - b. Sang sapa sira ugi sane tan kepatutang manut pararem.
 - c. Sungkang ila, buduh utawi edan.
 - d. Sane tan madue kasucian urip (naenin nglaksanayang Sat Tetayi).
- (4) Prabeya kapamangkuan :
- a. Adiksa widdhi , kamedalin saha kalaksanayang olih sang ngadegang , makadi krama Desa.
 - b. Mapitra yadnya wiwekas , patut kasungkemin olih krama Desa , sanistane Brahma Prayascita , prade yadnyane manut pararem.
- (5) Pamangku patut ngamanggehan sesananing pamangku, luire :
- banija
- a. Ambek dharma sadhu
 - b. Asewaka dharma, makadang satra utama.
 - c. Tan parek ring naya dusta.
 - d. Tan atayub ring tarub cemara yudha.
 - e. Tan manjing ring umah wong karma.
 - f. Tan manjing ring umah wong dratikrama.
 - g. Tan pati pikul-pikulan.
 - h. Tan pati salab – sulub.
 - i. Tan anginum asing ngawa mada.
 - j. Tan wenang ajajuden.
 - k. Tan onang anayub toyaning cor , yan mawyadi teka wenang adewa saksi.
 - l. Tan griganing wong akuweh.

m. Tan keneng cuntakaning wong len, sajawaning :

1. Paguruan, 3 (tigang) rahina.
2. Manatah asiki , 5 (limang) rahina.

Pawos 46

Swadharmaning Pamangku , luire :

- a. Ngenterang upacara ring khayangan utawi ring soang-soang pakubon krama.
- b. Sarin canang rikala piodalan , manut pararem.
- c. Upon palaba , manut pararem.
- d. Luput pakaryan lan rerampen miwah padagingan.
- e. Patias tiosan manut pararem.

Pawos 47

Patias utawi olih-olihan Pamangku, luire :

- a. Sarin canang soang-soang pakubon krama Desa.
- b. Sarin canang rikala piodalan, manut pararem.
- c. Upan palaba, manut pararem.
- d. Luput pakaryan lan rerampen miwah pedagingan
- e. Patios tiosan manut pararem.

Pawos 48

(1) Pamangku kagentosin, riantukan :

- a. Seda
- b. Pinunas ngraga, menawi kageringan.

- c. Kawusan olih krama Desa, duaning malaksana tan patut.
- (2) Prade Pamangku kawusan sangkaning melaksana tan patut, keni pamidanda manut pararem , saha ngawaliang prabea pawintenang pecak.
- Pawos 49.

Kasukertan khayangan sakadi ring sor :

- a. Tan kalugra ngranjing ka Pura , luire :
1. Sang katibang cuntaka manut bacakan cuntaka.
 2. Makta sahanan barang sinanggeh ngeletehin manut sastra Agama.
 3. Sato agung , sajabaning rikala mapapada.
 4. Mabusana tan manut kadi tata caraning ngranjing ka Pura.
 5. Sadereng polih wak-wakan utawi pituduh saking Prajuru.
- b. Indik cuntaka ritatkala nemoning karya ring Pura utawi paumahan raris katiben kelayu sekaran , sane keni cuntaka ; sang nruwenang , pengapit nyatur semeton pasidikaran keni cuntaka ngantos polih tirta pamarisudan.
- c. Pratingkahe tang wenang ring Pura, luire :
1. Masumpah , macoran , sajawaaning pituduh Prajuru .
 2. Majajaal , miyegan , napi malih jantos kanin ngamedalan rah.
 3. Mabacin, mawarih, masanggama, makolem dados asiki lanang wadon.
 4. Macecepin rare , nyangsang busana , menehin pusungan .
 5. Rikala majahitan patut ngelung semat utawi busung, macingor lidinnyane.
- d. Sang mamurug kocap ring ajeng, keni pamidanda pamrasyascita manut pararem.
- e. Pakantenan candalane wenten 3 (tigang) soroh luire :
1. Utama , malaksaana ring jroan Pura .
 2. Madya , malaksana ring jaba tengah Pura.

3. Nista , melaksana ring jaba sisi Pura.
- f. Bilih wenten sinalih tunggil krama manggihin utai mireng wong melaksana sekadi inucap ring ajeng, patut digelis masadok ring Prajuru Desane, tur sang malaksana katiwakin pamindanda menurut pararem.
 - g. Bilih wenten sinalih tunggil krama Desa malaksana paradara utawi dratikrama :
 1. Patut keni upacara pamrayascita gumi.
 2. Upacara punika kawentenan melarapan antuk krama sane mamerat sane pastika sampun wenten bukti miwah saksi.
 3. Agung alit upacara punika kalaksayang ring jaba Pura Desa, kasaksinin olih Prajuru Desa.
 - h. Panyanggra tapakan utawi ilen-ilen sane patut kapingitang kasuciannya, upami ; Barong , Rangda , Pratima miwah sane tiosan, patut kaapastikayang antuk Bandesa utawi Pamangku.
 - i. Prajuru-prajuru Desane utawi Bandesa tan maren nureksain nitenin mangda i Pamangku ajeg nganutin sesananya dumugi tegag kasucian nyane.

Pawos 50

- (1) Sane dados munggan tedun ring palinggih khayangan wantah Pamangkun sane sampun kapastikayang antuk Prajuru Desa utawi Bandesa Adat.
- (2) Sajabaning sang kapastikayang kadi ring ajeng, sapisira ugi tan dados munggan tedun ring palinggih-palinggih miwah ngambil Pralingga ring Khayangan Desa.

Pawos 51

- (1) Yin wenten jadma karawuhan ring Pura , dados kapintonin , prade rumasa kasumangsayaan , yan tan wiakti jadma punika kasisipang manut pararem.
- (2) Prade Khayangan kahanan durmanggala, minakadi keni bhaya , Pamangku utawi sang manggihin , patut digelis nyadokang ring Prajuru, mangda marumang Desa tur ngaturang pamrasyascita sapatuta.

Pawos 52

Tiosan ring piodalan utawi tegak piodalan ring soang-soang Khayangan taler patut kamargiang Dewa Yadnya sekadi ring sor :

1. Maturang ring Purnama, Tilem, Kajeng Kliwon.
2. Piodalan saraswati, Pagarwesi, Galungan Kuningan.
3. Panyepian miwah Siwaratri.

Upacara inucapo kamargiang manut kecap sadtra Agama lan pararem.

Palet 2

Indik Resi Yadnya Pawos 53.

Indik Kawikon utawi Dwi Jati :

- a. Sang pacang madwijati sajabaning nunas panugran ring sang Mawang Rat utawi Parisadha Hindu Dharma Indonesia, taler patut masadok ring Prajuru Desa utawi Bandesa Adat.
- b. Prajuru Desa inucap patut sareng nureksa nitenin mangda sulur kalih pamargine jati-jati manut ring kecaping sastra Agama, sane patut katureksain pinih ajeng kacedanggan kasucian raga.

- c. Bilih wenten kanton nyantulin, Prajuru Desa inucap patut atur uninga ring sang Mawang Rat jati-jati manut ring kecaping sastra Agama.
- d. Prajuru Desane inucap taler patut sareng nyaksinin parmargi upacarane.
- e. Sesampun upacara inucap puput, Prajuru Desane patut digelis ngutsahayang mangda parab sang diniksan sane munggah ring ilikita kagontosin antuk biseka kawikon manut panugrahan nabenida, saha nyobyahang ring paruman Desane kapungkur.
- f. Upacara nglinggihang wedana kapungkur, taler patut kasaksinin saha kasobyahang ring krama Desane.

Pawos 54.

- a. Prajuru Desane patut nutun krama desane ngawas nitinin sapamargi parawikune ring wewidangannya buat mikukuhin kesucian linggi ida.
- b. Prajuru Desane pamekas Bandesa Adat digelis atur uning ring Naben ida, prade wenten kacihnian wiku sasar ring sesana.
- c. Atur piuning ring ajeng patut kadulurin antuk cihna anut ring Tri Pramana Bhukti Saksi likita.
- d. Daging pamutus bawos sane katiwakang antuk naben ida digelis kasobyahang ring paruman Desane kapungkur.
- e. Prade pamutus tetiwak ring ajeng kapikayun durung sida tinas apandang, Prajuru Desane patut atur supeksa ring sang Mawang Rat utawi Parisadha Hindu Dharma Indonesia.
- f. Pamutus tetiwak nabe sane sampun kasangra antuk sang Mawang Rat inucap sinanggeh pamutus pastika tan kawicarayang malih.
- g. Prajuru Desane tan wenang lumaksana matetiwak ring meraga Wiku.

Pawos 55

Indik Mawinten utawi Eka Jati.

- a. Sahaning krama Desa ngemangkuin , nyonteng , dalang , kabayan saluire pacang ngenteran yadnya patut masadok ring Bandesa Adat tur patut mawinten pinih riin.
- b. Prajuru Desane inucap ngawas nitenin mangda pamargine manut ring kecaping sastra Agama.
- c. Prade kacihnan nyasar ring kecaping sastra Agama, Prajuru Desane wenang mialangin.
- d. Sang sane tan terimaring tetiwak Prajuru Desa inucap dados nunas pamutus ring sang Mawang Rat utawi Parisadha Hindu Dharma Indonesia.
- e. Pamutus baos sane katiwakang antuk sang Mawang Rat sinanggeh pamutus pastika, ten wicara malih.
- f. Prajuru Desane patut sareng nyaksinin upacara sang mawinten sepatutnya tur patut digelis nyobyahang ring paruman Desane saha tegap ring wates kawenangannya muput yadnya ring Desa.
- g. Krama Desane patut nyarengan ngawas nitenin , katutun olih Prajuru Desane mangda yadnya sane kamargiang mangda kaicen pamutus olih sang Sulinggih utawi sang ngawenangan.
- h. Prade wenten ngalempasin, bilih-bilih sane pastika nyumuka , Prajuru Desane wenang ngalangin utawi ngurungang yadnya inucap.

Palet 3
Indik Pitra Yadnya
Pawos 56

Pamargin Pitra Yadnya madudonan sekadi ring sor : a.

Pangupakaran sang kelayu sekaran :

Pemargin atiwa-tiwa ring Desa Adat singakerta ngawit warsa 2022 puniki kepah dados 2 (kalih) pemargi inggih punika :

1. Antuk menden, utawi ngeseng , maka cihna makingsan ring ring ibu pertiwi utawi ring Bhetara Brahma selami nuptupang prabeya.
2. Ritakala Krama wenten sane kelayu sekaran arsa pacang nglantur pacang ngaben utawi plebon kedadosan memargi. Setiosan ring sane ngangganin Jro Mngku; (inggian khayangan tiga Jro Mangku Manca, taler jro Dalang, Topeng . Balian Sonteng)

b. Upacara-upacara Pitra Yadnya , riwusan kaabenang raris pangiriman lan ngarorasin.

Pawos 57.

Swardhamaning lan tetegenan prade wenten sinalih tunggil karama sane kelayu sekaran :

a. Sang kaduhkitan :

1. Masengker aselid padut nyadokan ring kelian Banjar saha nunas tetimbang ring Bandesa Adat ring kawentenannya .
2. Ngaturan Krama Banjar makarya eteh-ete.

b. Krama Desa utawi Banjar :

1. I kelihan patut ngunggahang sang seda inucap ring ilikita Banjar.
2. Kelian Banjar maritatas sang pamargin sang kaduhkitan , indik pacang kapendem utawi makingsan riin.
3. Prade kapendem utawi makingsan ring geni , raris kawentenan suaran kulkul pamitahu olih kelian Banjar
4. Penyanggran Banjar selanturnyane :
 - 4.1 Soang-soang krama Banjar nedunin lan ngemedalang manut pararem.
 - 4.2 Ngrombo ngaryanin eteh-ete sa kasarengin olih krama sane rauh maaksian.
 - 4.3 Sami krama Banjar nganter ka setra jantos pamendeman utawi ngeseng punika kantos puput.

c. Krama Desa pacang ngangge setra, patut nunas wak-wakan ring kelian utawi Bandesa Adat saha tatane ngangge setra manut kadi patuduh Prajuru inucap.

d. Krama Desa inucap patut nitenin mangda sehaninaning leteh setrane ten wenten ngalalah utawi kabakta ka Desa pakraman, bilih-bilih ka genah sane suci.

e. Prade sane pacang katunjel utawi kapendem maring setra boya sawan warga Desa, patut ngaturang upacara paletahan utawi naur penanjung batu , agung alit manut pararem.

f. Prajuru Desa patut nitenin tur nutun mangda yadnya punika prasida punika prasida tinas tan nyantulin kasukertan Desa utawi khayangan.

g. Pakaryan atiwa-tiwa patut kaserahang ring krama Banjar patus tur, makuta nyanggra.

h. Sang sane matempung ngaben, keni upacara pacaruan panca sata ring pangulun setra.

i. Tan dados ngalelet langkungan ring 7 (pitung) rahina , sang kaduhkitan patut polih pagebagan manut paetangan Prajuru.

j. Tan kalugra nginepang bangbang.

k. Tan kalugra mendem utawi makingsan ring geni rikala :

1. Semut sadulur

2. Kala Gotongan
 3. Was panganten
 4. Rerainan Gumi
 5. Nemonin piodalan ring khayangan
 6. Prawani
 7. Purnama utawi tllem
 8. Kajeng kliwon
 9. Pasah
 10. Somo manis tolu
 11. Ingkel wong
 12. Tegak rerainan sang kalayusekaran.
- l. Prade wenten kelayu sekaran sajroning Piodalan dados memdem tan nyuarayang kukul , makingsan , medem rikala wengi manut pituduh Prajuru Desane.
 - m. Prade wenten jadmada seda sangkanin sungkan ila patut kageseng ring setra , melarapan upacara makingsan ring gni , abu nyane kapendem.
 - n. Prade wenten jadmada Seda, sangkaning salah pati , ulah pati lan kapangawan , dados kaupakaranin seda bener , sakewanten kariinin antuk upakara panebasan alit ring genah nyane seda.
 - o. Prade wenten anak istri seda kantun ngadut manik , patut kalaksanayang upakara masadak riin , wawu raris kapendem .

Pawos 58

- a. Wewanengan Atiwa-tiwa kamargiang sasuen-sasuenya 10 (dasa) warsa apisan antuk ngerit , utawi segelis- gelisnya 3 (tigang) warsa apisan.
Taler wenten kecap ring sastra Agama,
- b. Mantuk ring sang sulinggih , Pamangku , Bandesa Adat patut kaprabeyayang pramangkin.
- c. Yan ritatkala ngemargiang atiwa-tiwa , ngusung sawa wiadin watangan mangda ngemargiaang becik trepti , tan kalugra ngumpang-ngamping utawi mungsang – mangsing , prade wenten mamurug wenang kadanda manut pararem.
- d. Sajroning ngemargiang atiwa-tiwa kadi inucap ring ajeng Prajuru Desane utawi Banjar pinaka mangala pangenter ydnya patut nadab tur nudonang krama , mapaweh panyanggra ring sang mayadnya ngantos puput yadnya sane kabaos ; Satwika Yadnya.

Pawos 59

- (1) Atiwa-tiwa , Pangabenan kalaksanayang antuk :
 - a. Sawa Prateka.
 - b. Nyawa Rsi.
 - c. Swasta.
- (2) Dedudona pangabenan , ngawit sakeng ngagah utawi seda , ngeseng , pangiriman jantos ngarorasin .
- (3) Pamargi patus Pitra Yadnya miwah pangingune manut pararem.

Pawos 60

K a c u n t a k a n

- (1) Sane kasinanggeh kacuntakan , sekadi ring sor :
 - a. Cuntaka antuk kalayu sekaran.
 - b. Cuntaka antuk ngrajaswaala
 - c. Cuntaka antuk ngebas putra.
 - d. Cuntaka antuk karuron
 - e. Cuntaka antuk sungkan ila utawi buduh
 - f. Cuntaka antuk pawiwahan
 - g. Cuntaka antuk gamiagamana.
 - h. Cuntaka antuk salah timpal.
 - i. Cuntaaka antuk yening wenten anak istri mobot nenten kaupakarain pabyakawonan utawi pawidhiwidhana.
 - j. Cuntaka antuk mamitra mamitra ngalang
 - k. Cuntaka antuk yening wenten anak istri ngemedalang putra sadurung maupacara pabyakawonan utawi pawidhiwidhana (pamrasan).
 - l. Cuntaka antuk sed Tetayi.
- (2) Sengker cuntaka manut kawentenannya :
 - a. Kelayu sekaran , cuntakanya kaanutang sakadi loka dresta miwah sastra dresta taler manut pararem.
 - b. Cuntaka ngrajaswala , 3 (tigang) rahina ngawit saking ngrajaswala utawi selaminnyane ngrajaswala.

c. Ngebas putra , cuntaka ;

Sane istri 42 (petang dasa kalih) rahina , ngawit saking putrane embas , utawi jantos risampun kaupakarain makambuhan tur maprasyascita manut sastra Agama . Sane lanang jantos putrane kepus odel. d. Karuron cuntakanya ;

Sane istri 42 (petang dasa kalih) rahina tur sesampune matirta prayascita . Sane lanang 12 (roras) rahina utawi manut pararem.

e. Sungkan ila utawi buduh , cuntakanya manut ilikita pastika saking sang Ngawa Wenang.

f. Pawiwahan , cuntakannya jantos sesampun kaupacarain pawidhiwidhana..

g. Gamyagama , cuntakanya jantos sesampune kapalasang utawi kasampihang tur kawentenang pamrayascita raga miwah karangnyane.

h. Salah Timpal , cuntakanya jantos sesampun kaupacarain manut sastra Agama lan pamrayascita Desa.

i. Anak istri mobot tan kawentenang upakara pabyakawonan utawi pawidhiwidhana , cuntakanya ngantos kaupakaarain.

j. Ngembas putra tan kawentenang upakara pabyakawonan utawi pawidhiwidhana , putra jantos wenten sane mameras kundul.

k. Mamitra ngalang , cuntakanya nganto sesampune kawentenang pabyakalan.

l. Sad Tetayi , cuntakanya ngantos sesampun maprayascita raga turmaning nenten dados ngemunggahang upakara padwijatan.

(3) Ngebas putra buncing , cuntaakanya sakadi ngembas putra biasa , sakewanten patut Desane ngawentenang pamrayascita jagat antuk pacaruan Bhumi sudha , panca sata ring jaba Pura Bale Agung , masengker rare punika mayusa 42 (petang dasa kalih) rahina.

(4) Cuntaka klayu sekaran :

a. Kapendem utawi kageseng ; cuntakanya :

a.1. Banjar , 3 (tigang) rahina ruwusan mendem utawi ngeseng utawi sesampune polih maprayascita (masapuh).

a.2. Kulawarganya sajroning pakarangan , jantos 12 (roras) rahina.

a.3. Kulawarga sane tiosan tunggal sembah (purusa) 7 (pitung) rahina.

b. Ngaben cuntakanya :

b.1. Banjar ngawit saking ngendag ngantos mapegat.

- b.2. Sang nyambut karya , ngawit saking nyambut padawasan ngantos riwusan yadnyane utawi mapegat kelanturan malih 3 (tigang) rahina.
 - b.3. Kulawarga sang nyambut karya , manut pararem.
- (5) Prade wenten sinalih tunggil krama Desa kacuntakan antuk mapendem utawi kaabenang , saking dura desa cuntakan krama inucap manut pararem.
- (6) Sane katiban cuntaka , luire :
 - a. Kalayu sekaran :
 - a.1. Sang kalayu sekaran.
 - a.2. Kulawarganya manut pararem.
 - a.3. Bebanjaran , manut pararem.
 - b. Ngrajaswala , sang sane ngrajaswala.
 - c. Ngebas putra , kulawargan sane ngebas putra lanang miwah wadon.
 - d. Karuron , kulawarganya lanang wiwah wadon.
 - e. Sangkan ila , buduh , sang kasungkanang.
 - f. Pawiwahan sang sane maupacarain lanang istri.
 - g. Gamyagumana , sang malaksana.
 - h. Salah timpal , sang malaksana wiwah Desa Adat.
 - i. Anak istri mebot nenten kawentenan upakara pabyakawonan utami pawidhiwidhana , sang meraga istri.
 - j. Ngembas putra tan kawentenang upaka pabyakawonan utawi pawidhiwidhanan , sang ibu lan putra nyane
 - k. Mamitra ngalang , sang malaksana.
 - l. Sat Tetayi , sang malaksana .
- (7) Tan keneng cuntaka , luire :
 - a. Sang sulnggih lan pamangku khayangan sajawaning sakadi, Pawos 45, angka 5, angka 5, m.
 - b. Rikala piodalan, ri sampun ngalang sasih.

- (1) Manusa Yadnya inggih punika , upakara upacara dharmaning manusa ngawit saking patemoning kama bang kalawan kama petak sajroning garbha , mgantos kalayu sekaran riwekas.
- (2) Upacara sekadi ring ajeng , madudonan sekadi ring sor :
 - a. Magedong-gedongan , duk pengrempinian i biang .
 - b. Duk sang kama reka medal .
 - c. Kepus udel .
 - d. Roras rahina .
 - e. Tutug kambuhan .
 - f. Nigang sasihin
 - g. Pawetonan .
 - h. Tutug kelih ; ngrajasuwala wadone , ngrajasinga lanange.
 - i. Mapandes .
 - j. Pawiwahan .
 - k. Mawinten.
- (3). Upakara upacara inucap nista , madya , utama manut sastra Agama lan dresta.

Palet 5
Indik Bhuta Yadnya
Pawos 62.

- (1). Bhuta Yadnya inggih punika , upacara upakara byakala ring prathiwi miwah khayangan , sarwa prani saha upakara-upakara ring babhutan lan piranti-piranti .
 Upacara pabyakala ring sawrwa prani , luire :
 - a. Ring sarwa tumuwuh , rikala tumpek pengatag , caniscara kliwon wariga.
 - b. Ring sarwa ingon-ingon , rikala tumpek kandang , caniscara kliwon uye .
 - c. Ring piranti- piranti :
 1. Wayang , ring saniscara kliwon wayang.
 2. Sarwa lelanguan , ring saniscara kliwon krulut .
 3. Sarwe landep , ring saniscara kliwon landep .
 4. Sarwa ayandana , ring saniscara kliwon kuningan .
- (3) Upacara pabyakala ring pertwi , khayangan lan babhutan kawastanin ; mecaru .

- (4) Pacaruan inucap ring ajeng , nista , madya , utama , manut wiguna , sakadi ring sor :
 - a. Eka Sata .
 - b. Panca Sata.
 - c. Panca Sanak .
 - d. Rsi Gaana .
 - e. Tawur Agung .
 - f. Panca Kelud .
- (5) Sajabaning kadi ring ajeng , kawentenang upacara :
 - a. Majot –jotan utawi ywdnya sesa , nyabran wusan ngrateng .
 - b. Maspuh-sapuh , rikala pacang ngawentenang wali ring pura.

Pawos 63.

- (1) Nyabran ngawarsa rikalaning tilemkasanga , kawentenang Tawur kasanga maka cihna mapag rahina Nyepi benjang nyane.
- (2) Brata panyepian patut kamargiang olih krama Desa :
 - a. Amati Gni , ten dados meapi-api .
 - b. Amati karya , tan dados nyambut karya .
 - c. Aamati Lelungan , tan dados melancran .
 - d. Amati Lelanguan , tan dados maoneng-onengan masuara ghora.
- (3) Pabraton inucap kamargiang saking medal surya rauh medal surya benjang nyane .
- (4) Sang mamurug kecap ring ajeng keni pamidanda manut pararem , kamargiang olih pecalang Desa , sajabaning wenten wak-wakan saking Prajuru .
- (5) Riwus rahina Nyepi , benjang nyane maka cihna pengawit Isaka warsa , patut warga Desane sami ngaksama utawi madharma santhi.
- (6) Pacaruan sasih manut dresta utawi sastra Agama , nemoning sasih kelima , kanem , kapitu , kaulu lan kasanga sawanang wenten durbhiksan jagat .

SARGA V

SUKERTA TATA PAWONGAN

Palet 1

Indik Pawiwahan

Pawos 64

- (1) Pawiwahan inggih punika , patemoning purusa lawan pradana
Malarapan panunggalan kayun suka lila , kadulurin upasaksi sakala niskala .
- (2) Palaksanaan pawiwahan , luire :
 - a. Padikan , kamanggala antuk pakrunayan .
 - b. Ngrorod , ngrangkat riin , wawu kakrunayang .
 - c. Nyeburin , utawi nyantana .
- (3) Pidabdab sang pacang mawiwaha , patut :
 - a. Sampun manggeh daa truna (nganutin undang-undang perkawinan).
 - b. Sangkaning pada lila , tan kapaksa.
 - c. Manut kecap sastra Agama.
 - d. Kasdhi wadani , prada pangambile tiosaan Agama mapatiwangi ,
 - e. saking sang prada pengambilan tios wangsa .
- (4) Pamargin pawiwahan mangda nganutin Undang-undang Perkawinan Mawang Rat .

Pawos 65

- (1) Pawiwahan sane kapatutang ring Desa , sakadi ring sor :
 - a. Sampun kamargiang pabyakala utawi pasakapan , olih Pinandita utawi Pandita , kasaksiang sekala niskala .
 - b. Wenten pasaksi Prajuru sane mapakelingang utawi ngilikitayang pawiwahan.
 - c. Sampun matengeran suaran kulkul .
 - d. Pawiwahane inucap ring ajeng sampun kailikitayang ring sang Mawang Rat .
- (2) Parabian sane tan manut kadi ring ajeng , sinanggeh tan patut.
- (3) Prade tan manut , kelihan digelis malasang sang ngarorod punika tur wenang kaicen pasayuban ring Jro Kelihane , selanturnya I Kelihan patut ngrawuhang ring reraman nyane , bilih ring sajroning Desa , bilih matiosan Desa, Kelihan patut ngaturang indik punika ring sang Mawang Rat.

- (4) Sang lanang sane malaksana punika patut kaparitatas olih I Kelihan , sesaampan janten iwang patut nyane , yin sang mamisoka punika sajroning Desa patut keni pamidanda manut pararem bilih matiosan Desa patut katundung .

Pawos 66

- (1) Bilih wenten anak maseserep pacang netes sang ngarorod patut masadok dumun tur nunas panuntun ring Kelihan Banjar utawi Prajuru Desa , saha ilikita pastika saking Desanya
- (2) I Kelihan patut nureksa natasang paserep , napi jati-jati sang ngarorod punika padruwen sang maseserep , indik punika patut kapastikayang antuk swalapatra saking Desane.
- (3) Yan sampun pastika manut , I kelihan wenang nganter saserep punika ka genah sang ngarorod.
- (4) Sang maseserep patut tinut ring pituduh Kelihan nganinin tata cara sekadi ring sor :
- a. Ngranjing tan dados langkungan ring 3 (tigang) diri
 - b. Tan dados makta sanjata , gegawan saluire .
 - c. Tan dados mabawos kasar utawi nantang .
 - d. Sang netes miwah sang kaparitetes patut mabaawosan suka lila , sadu hurep.
- (5) Katretian tata cara panetesan kapidabdab antuk kelihan mangda anake istri sane ngarorod jati-jati nerangang idep nyane sesinah-sinahnya tur sang maseserep taler mangda polih mirengan bawos anake istri punika.
- Pidabdabe sekadi ring sor :
- a. Anak istri kagenahang ngraga tan dados anaj sewos nganampekin tur genah nyane tinas tur inang.
 - b. I Kelihan nuntun nyulurang mangda sang maserep polih mataken ring sang istri punika .
 - c. I Kelihan nymakutayang pamekas ring sang istri mungguing sang sane pacang ngicenin pasayuban manut idep sang istri .
- (6) Yaning sampun arsa , sang masaserep wenang katulak antuk I Kelihan , yening sangkan papaksan sang masaserep wenang ngambil anake istri kabakta budal.
- Sang lanang patut katur ring sang Mawang Rat , yan punika matiosan Desa . Yan tunggal Desa patut katiwakin pamidanda manut pararem tur katur ring sang Mawang Rat.
- (7) Pamuput I Kelihan dumugi malaksana manut ring idep anake istri inucap.

Tata cara parabian , patut sangkaning ring sor :

- a. Sapa sira ugi pacang ngawararang pakulawarganya patut masadok ring Prajuru , sanistanya 3 (tigang) rahina sadurung dewasa kamargiang , salanturnyane Prajuru maritatas manut tan manut pamargian parabiane .
- b. Pamargian papadikan manut dudonan :
 1. Pakrunayan jantos ping 3 (tiga) saha soang-soang malarapan :
 - 1.1. Kapartama , antuk canang
 - 1.2. Kaping kalih , antuk canang lan pras daksina , canang pangrawos.
 - 1.3. Kaping tiga , taler antuk canang lan pras daksina anggen papamit ring pamrajan , kabawos ppmuput papadikan .
 2. Risampune manut sakadi ring ajeng, raris sang istri kaathang ngalantur kaajak budal ring pakubon sang lanang, saha kalanturan antuk pabyakala.
 3. Mangda puput sekala niskala kulawarga parusa makta pejati ring pamrajan wadone.
- c. Prade ngrorod utawi ngrangkat patut :
 1. Kulawarga lanange kawentenan panglukuan antuk duta sakirangnya 3 (tigang) diri.
 2. Pagenahan antene tan dados ring pakubon sang lanang sadereng kaupacarain pabyakala.
- d. Sajroning pakrunayan utawi panglukune, patut :
 1. Kamanggala antuk geng pangampura arep ring kulawarga wadone.
 2. Kaigumang baos idih pakidih utawi palegayan arep ring pasewakan ring sang ngidih, saha dewasa pakrab kambenya riwekas.
 3. Kacihnayangindik kapurusa,utawi prade Santana rajeg kajejerang kapatut ngidih anak lanang sane kabaos pawiwahan nyeburin.
 4. Prade tan terima pejatine, pakrunayan tetep kamargiang ping 3 (tiga).
- e. Pakrab kambean mapiteges upacara tinas apadang utawi puput mapakuren, duaning manut sakadi ring sor :
 1. Sajroning kabaos ambe, kalaksanayang sakala niskala, antuk sarana jejauman miwah pawidhiwidhana ;
 - 1.1. Jejauman pinaka ngambe utawi ngadungang kayun soangsoang pakulawargan wadone.
 - 1.2. Widhiwidhana pinaka pajati niskala nunas wadone ring Pamrajannya.

2. Sajroning baos kerab, pamargin ring sakala ;

2.1. Antuk pasaksi karma, kasade antuk Prajuru Desa.

2.2. Pamekas pasaksi Prajuru sane ngilikitayang.

- f. Yan pajangkepan inucap lempas ring kecap sastra Agama, upami Gamyagamana sane kasinanggeh ngranayang terak ikang jagat, Prajuru patur ngurungang pajangkepan inucap.
- g. Prajuru sane maka saksi patut nitenin indik sultur pamargin paiwahannya, bilih-bilih wenten sane mabuat, upami bebaktan tetadtadan sang istri minakadi artha brana miwah sane tiosan.
- h. Wus punika Kelihan Banjar utawi Desa patut digelis ngunggahang ring ilikita Banjar saha nyobyahang ring paruman kapungkur.

Palet 2
Indik Nyapian
Pawos 68

Nyapian utawi wusan mapikuren kasinahang antuk : a. Salah tunggal seda.

b. Sangkaning pada lila.

c. Mawiwit wicara.

- (2) Prade wenten sinalih tunggil karma pacing palas maparabian patut masadok ring Prajuru Desa.
- (3) Prajuru Desa patut nureksain sakaluwir wicara, patut ngicenin pidabdab mangda prasida ngurungan pakayune palas marabian.
- (4) Prada pidabdab Prajuru inucap nenten katinutin, I Prajuru patut mituduhin mangda sang mawicara nglanturang ring sang Rumawos.
- (5) I prajuru prasida nrima indik palas maparabian prade sampun wenten pamutus saking sang Rumawos, tur nyobyahang kahanan sang palas antuk ilikita pamutus.
- (6) Nganinin indik pagunakaya, tetadtadan miwah pangupajiwan Santana sang palas maparabian manut pamutus sang Rumawos.
- (7) Sahananing krama sane palas maparabian patut keni tetegenan sakadi ring sor :
 - a. Keni upacara pamamitan ring Pamrajan sang lanang rauh ring
Pamrajan sang wadon, tur maprayascita kasaksinin olih Prajuru Desa.
 - b. Prabeya upacara punika patut kategen olih sang ngawe wicara.
 - c. Sajawaning karma sane palas sangkaning seda, pamidanda kategen antuk sang balu sane mulih daa.
 - d. Nawur prabeya panebas suaran kulkul.
- (8) Indik mulih daa :
 - a. Sane patut ngundulang sang sane nyangra ayah ngarep.
 - b. Sahananing bekel sane kabakta patut kasukserah pangupapiranya ring sang ngundulang.
- (9) Prade riwekas sang palas marabi adung malih, patut mawali nglaksanayang pawiwahan tur keni pamidanda nikel, manut pararem.

Pawos 69

- (1)
- (1) Sang balu kabinayang dados :
- Balu luh wit Santana utawi Santana rajeg, miwah balu luh boya santana rajeg.
 - Balu muani kapurusan utawi wit Santana, miwah balu muani nyeburin boya Santana.
- (2) Swadharmaning balu inucap, patut :
- Ngamanggehang pati brata, tan dados ngamargiang paradara utawi dratikrama.
 - Nguasayang waris pagunakaya, tan dados ngadol, ngadepan, akidihang lan tiosan punika, sajawaning antuk paiguman saking pianak utawi kaluwarga pinih tampek saking kurenannya, prade pianak kantun alit-alit.
 - Dados ngidih Santana prade wenten pidabdab sadurung sinalih tunggil padem, saha kaigumin olih kaluwarga kapurusa.
 - Kawenangang mawiwaha malih, prade polih paigum kulawarga pinih tampek ring kurenannya.
- (3) Balu kaucap tan pageh, sakadi ring sor :
- Dratikrama utawi Paradara.
 - Matilar saking pakubon tan pasadok jantos 6 (nem) sasih.
 - Lempas ring swadharma tiosan, tan prasida ngehehin solah, maprawerti arep ring pituduh sane patut saking kaluwarga purusa.
- (4) Prade wenten balu tan pasantana utawi tan maduwe Santana, pageh ring swadharmanyanane tan wenang katundung, prade tan prasida adung, sang balu inucap polih pah-pahan upon.

Palet 3
Indik Santana
Pawos 70

Santana wenten kalih pawos inggih punika ; Prati Santana miwah santana Paperasan.

- (2) Prati santana inggih punika ; santana sane metu saking pawiwahane sane patut.
- (3) Prade wenten santana metu saking pawiwahan tan patut, patut kemanggala antuk payangaskara mangda tan kantun mawasta Bebinjat utawi Astra.
- (4) Prade pawiwahane tan ngawetuang santana, dados ngidih santana malarapan upasaksi sakala niskala sane kawastanin Santana Paperasan.
- (5) Santana rajeg inggih punika, prati santana wadon utawi pradana sane kemanggehang lannag utawi purusa, tur ring sampun nglaksanayang pawiwahan kaceburin.

- (6) Sang sane dados kaarsayang santanan rajeg inucap kadi angka 5 ring ajeng, inggih punika :
- Pratisantana wadon tunggal.
 - Sampun kamanggehang dados pratisantana purusa.
 - Sampun nglaksananyang pawiwahan kaceburin, kautamayang jadma sane magama hindu, utawi jadma magama tiosan, nanging sampun nglaksanayang upacara sudhiwadhani.
 - Sane kamanggehang santana rajeg patut masadok ring Kelihan utawi Bandesa Adat, tur Kelihan utawi Bandesa Adat patut nyobyahang ring krama Adat.

Pawos 71

- (1) Ngadegan santana patut nganutin dudonan, maka cihna artha brana paperasan, sane kasaksiang sakala niskala.
- (2) Sapasira ugi krama pacing ngidih santana patut masadok ring Kelihan utawi Bandesa Adat, sanistanya 3 (tigang) sasih sadereng pamerasan, tur nunas pailikitan ring sang Mawang Rat.
- (3) Bandesa Adat patut nyobyahang ring krama, tur sang sapasira ugi rumasa tan lila, mangda nyodakang ring Kelihan utawi Bandesa Adat masengker sakirangnya 2 (kalih) wuku utawi 14 (pat belas) rahina sadereng pamrasan.
- (4) Prajuru Desa digelis mawosin saha ngicenin pamutus nepek ring Catur Dresta miwah pararem.
- (5) Prada sulur pamerasan tan manut kadi kecap ring ajeng Prajuru Desa wenang ngandeng sang makarya, saha ngicenin panuntun mangda kapuputang riin bebaose, sulur utawi wicaranya.

Pawos 72

- (1) Paperasan sane kapatut ring Desa, risampun maka cihna :
 - Widhiwidhana pamerasan.
 - Kasaksinin olih Prajuru Desa sane makelingan utawi ngilikitayang.

- (1)
 - c. Risampun maduwe Akta pangangkatan santana saking sang Mawang Rat.
 - d. Kasobyahang ring krama.
- (2) Sang patut kaperas angge santana sakadi ring sor :
 - a. Jadma sane magama Hindu.
 - b. Papernahan nedunang saking sang mamas.
 - c. Kulawarga saking purusa, prade tan wenten dados saking wadon.
 - d. Kautamayang saking waris pancer kapurusa.
 - e. Sinalih tunggil mawiwit saking kaluwarga tunggal Pamrajan, paibon, Panti utawi Dadia.
 - f. Prade tan wenten sakadi kecap ring ajeng, wawu dados sakamakama.
- (3) Dados ngangkat santana langkungan ring adiri, lanang utawi wadon.
- (4) Krama pamuluhan ngrereh santana dados sakama-kama tur kasadokang ring Prajuru Desa.
- (5) Ritatkala upacara kamargiang, Kelihan utawi Bandesa Adat patut nodia, pinaka saksi utama, tur ngunggahang ring ilikita.

Palet 4
Indik Warisan
Pawos 73

Warisan inggih punika tetamian artha brana, utang piutang saha ayahayahan, ngupadi kasukertan sakala niskala saking kaluhurannya arep ring turunannya.

- (2) Kang sinanggeh warisan luire :
 - a. Druwe tengah makadi artha brana, pusaka, karang ayahan Desa, keris, siwakarana, Kahyangan.
 - b. Sanggah utawi Pamrajan.
 - c. Pagunakayan, tetadtadan (jiwa dana).
 - d. Hutang piutang.
- (3) Wawu kengin kabaos warisan, prade wenten :
 - a. Sang mapiturun utawi pawaris.
 - b. Katurunan utawi ahli waris.
 - c. Artha brana miwah tetegenan utawi ayah-ayahan maka cihna warisan.

- (1) Ahli waris luire :
 - a. Prati santana purusa.
 - b. Pratisantana prada utawi santana rajeg.
 - c. Santana paperasan lanang utawi wadon.
- (2) Prade tan wenten sakadi ring ajeng sang sinanggeh ahli waris :
 - a. Turunan purusa pernah ngunggahang, makadi rerama.
 - b. Turunan purusa pernah ka samping, makadi kaponakan, sameton, misan, mindon.
- (3) Yan wenten krama putung utawi camput tan maduwe papernahan waris, karang miwah tetamiannya patut kawenangan antuk dadianya, yan tan madruwe dadia, patut katur ka Desa Adat.

Pawos 75

Swadharmaning ahli waris, patut :

- a. Nrima saha ngwasayang tetamian pah-pahan saking kaluhurannya, ,akadi ngrempon Pamrajan, Pura, saha pangupakaranya miwah nyelediyinin tetegenan pawaris.
- b. Ngabenang pawaris saha nglanturang upacara-upakara pitra.
- c. Nawurin utang-utang pawaris manut pangloika lan bukti.

Pawos 76

Pangepahan warisan manut sakadi ring sor :

- a. Risampun kalaksanayang upacara Pitra yadnya lan utang-utang pawaris buntas katawur.
- b. Sajroning ngepah waris sang ngawaris patut masadok ring Prajuru Desa risampune ngamargiang adung supeksa ring kulawarganya.
Bilih nenten prasida kamargiang, sang ngawaris nunas kawenangan ring sang Mawang rat.
- c. Sinalih tunggil ahli waris tan polih pahan, prade :
 - 1). Nilar kawitan lan sesananing Agama.
 - 2). Alpaka Guru Rupaka.
 - 3). Sentana rajeg kesah mawiwaha utawi prati sentana nyeburin, soang- soang kabaos; Ninggal Kedaton.

(1)

d. Boya ahli waris dados muponin hasil, manut dudonan, luire :

1). Santana luh, salami dereng kesah mawiwaha tur nenten alpaka ring Guru
Rupaka.

2). Balu luh wiadin muani nyeburin.

3). Balu luh wiadin muani nyeburin sane mulih daa utawi truna, riantukan ring
pawiwahane pecak sampun kabaos; Ninggal Kadaton.

4). Pianak sane tan kaangkenin sane kasinanggeh astra lan bebinjat wantah kengin
ngawaris pagunakayan reramannya luh.

e. Pawaris kengin maweweh rikala maurip pinaka jiwa dana, tadtadan utaw bekel, maka
cihna paweweh tetep ring pianak sane kesah mawiwaha. Paweweh punika patut
kadulurin antuk masadokring Prajuru Desa.

Pawos 77

- (1) Prade sajroning pakulawargan wenten ahli waris langkungan ring adiri, patut :
 - a. Kawentenang paigum indik padum waris inucap.
 - b. Yan tan prasida, katunasang tetimbang ring Prajuru Desa.
 - c. Prade taler tan wenten cumpu ring panepas Prajuru Desa, kengin katunasang ring sang Rumawos.
- (2) Prade jantos karang Desa kapah utawi kasepih, patut soang-soang nedunin makrama Desa ngarep.
- (3) Prade karang inucap kaputungan, patut Prajuru nibakang ring :
 - a. Sang sinanggeh ahli waris, manut pawos 74.
 - b. Sang kengin anggen santana, manut pawos 70.
 - c. Prade taler tan wenten cumpu ring panepas Prajuru Desa patut katunasang ring sang Rumawos.

(1)

**SARGA VI
WICARA LAN
PAMIDANDA**

**Palet 1
Indik Wicara
Pawos 78**

- (1) Sane wenang mawosin minakadi muputang wicara ring Desa, luire :
 - a. Kelihan Banjar, prade sang mawicara sami tunggil bebanjaran.
 - b. Bandesa Adat, prade sang mawicara matiosan bebanjaran.
- (2) Prade sang mawicara tan wenten cumpu ring tata cara Kelihan Banjar mawosin minakadi ring daging pamutusna, wenang nunas bawos bebandingan ring Bandesa Adat.
- (3) Pamutus Bnadesa Adat arep wicara inucap sinanggeh wesananing bebawosan ring Desa, risampun majalaran adung supeksa ring paruman Krama Desa.
- (4) Yan tan cumpu ring bebawos pamutus Bendesa Adat, patut katunasang bawos pamutus ring sang Rumawos.

Pawos 79

- (1) Sahanan wicara sane mawiwit kacorahan sakaluire, miwah sinanggeh nungkasin daging Awig-awig, pararem miwah paswaran Desa utawi Banjar, ptut digelis kabawosin tan nyantosang pasadok.
- (2) Sajaba wicara kadi ring ajeng, patut nyantos pasadok sang nunas bawos.
- (3) Sahanan wicara patut katepasin jantos pastika iwang patut nya, malarapan antuk Tri Pramana, luire : Bhukti, Saksi, Likita.
- (4) Pamutuse patut tan maren nepek ring Catur Dresta, luire : Desa Dresta, Loka Dresta, Purwa Dresta, Sastra Dresta.
- (5) Sahanan pamutus tan maren ngupadi :
 - a. Mangda warga Desane sayan pastika uning ring wewatesan iwang patute.

- b. Mangda sang kaiwang rumasa andap kasor.
 - c. Sang molih tan maren katuntun mangda sampunang kaliwat nginggilang kapatutannya, mangda lila legawa ngampura sang sisip.
 - d. Mangda wenten arsa nyapsap bibit-bibit picayune mamusuhmusuhan.
- (6) Bandesa Adat patut nunasang pamatut ring sang Mawang Rat, prade wicara inucap sinanggeh ngawenang duskertan Desa.
- (7) Warga Desa sane tan cumpu ring pamutus Bandesa Adat wenang nunas bebandingan ring sang Rumawos.

Palet 2
Indik Pamidanda
Pawos 80

- (1) Desa utawi Banjare wenang niwakang pamidanda ring warga Desa utawi Banjar sane sisip.
- (2) Tetiak inucap kalaksanayang olih Bandesa Adat miwah Kelihan Banjar, nunggal-nunggal manut dudonan.
- (3) Bacakan pamidandane, luire :
- a. Ayah-ayahan panukun kasisipan.
 - b. Danda artha.
 - c. Upacara pangaskara.
 - d. Ngawaliang pipil utawi kanorayang.
- (4) Pamidanda sane katiwakang patut manut ring Awig-awig, pararem, paswara utawi dresta miwah sastra Agama, tur mangda kaadungan indik agung alit patut masor singgih manut ring kasisipannya.
- (5) Jinah utawi raja brana pamidandane ngranjing dados druwen Banjar utawi Desa Adat.

Indik Rerampagan
Pawos 81

- (1) Krama sane langkungan ring 3 (tigang) sasih amandel utawi negungin urunan miwah dedandan wenang karampag.

(1)

(2) Tata caraning ngarampag sakadi ring sor :

- a. Kalaksanayang olih Kelihan Banjar kasarengin olih krama pinaka saksi akenya 3 (tigang) diri.
- b. Sang karampag tan dados ngalangin sang ngarampag saha tan maren sareng nyaksinin pamargin rerampagan.
- c. Sang ngarampag patut wenten darsana ngambil barang-barang rerampag akenya manut ring agung alit utang 1 krama utawi nyawenin tanem tuwuh sane karampag.
- d. Kelihan Banjar utawi Prajuru Desa miteketin mangda barang reranpagane gelis ka tebus masengker 9 (sia) rahina.
- e. Yan smapun langkung ring 9 (sia) rahina taler nenten katebus wenang kalelang.
- f. Sajroning ngamargiang rerampagan tan dados ngrampag wewangunan sane kasirepin, barang sane patut keinggilang manut sastra Agama miwah mademang pangupajiwa.
- g. Mantuk ring Prajuru-prajuru tan dados nglaksanayang rerampagan.
Prajuru inucap kararianang dumun becik-becik.
Sasampune mawaneng 3 (tigang) sasih wusan dados prajuru sampun patut muputang utangnya.
Yan tan prasida muputang utangnya wawu dados karatgiang rerampagan manut ring ajeng.

SARGA VII
NGUWAH-NGUWUHIN
AWIG-AWIG
Pawos 82

- (1) Nguwah-nguwuhin Awig-awig Desa Adat puniki kalaksanayang ring paruman Desa Adat.
- (2) Awig-awig puniki kamargiang ngawit kasungkemin utawi karerenin.

Pawos 83

- (1) Sakaluir sane wenten saderengnya patut kaanutang ring sadaging Awigawig puniki.
- (2) Sakaluiring sane dereng kabaos sajroning Awig-awig puniki, patut kalaksanayang manut tata cara sane sampun mamargi, kadulurin antuk pararem-pararem.

SARGA VIII
PAMUPUT
Pawos 84

- (1) Awig-awig puniki kawastanin Awig-awig Desa Adat Singakerta.
- (2) Awig-awig puniki kararemin duk rahina : Sukra, Umanis, wuku Menail, pananggal kaping 2 (kalih), sasih : Kedasa, Isaka : 1918
Tanggal : 22 Maret 1996
Ring paruman Krama Desa, magenah ring jaba Pura Desa, Desa Adat Singakerta.
- (3) Awig-awig puniki kalingga tanganin olih : Bandesa Adat, kasarengin para Kelihan Adat sajebag Desa Adat Singakerta, saha kasaksinin antuk Kapala Dusun sajebag Desa Adat Singakerta, Kepala Desa Singakerta, Camat Ubud miwah maka saksi Bupati kepala daerah Tingkat II Gianyar.
- (4) Luir sang ngalinga tanganin :

(1)

a. Prajuru Desa Adat Singakerta :

1. Bandesa Adat Singakerta

()

3. Kelihan Adat Jukutpaku

()

5. Kelihan Adat tengah

()

7. Kelihan Adat Lobong

()

2. Penyarikan

()

4. Kelihan Adat Danginlabak

()

6. Kelihan Adat Dauhlabak

()

8. Kelihan Adat Katiklantang

()

b. Prajuru Dinas maka saksi :

1. Kepala Dusun Jukutpaku

()

3. Kepala Dusun Tengah

()

2. Kepala Dusun Danginlabak

()

4. Kepala Dusun Dauhlabak

()

5. Kepala Dusun Lobong

()

6. Kepala Dusun Katiklantang

()

7. Kepala Desa Singakerta

()

8. Camat Ubud

()

(1)

PARAREM

OM Swastyastu

OM Awichnamastu

Putusing paruman Prajuru pingkalih Payangga Desa, Desa Adat Singakerta, gumawe Pararem anggen mitegepin Awig-awig Desa Adat Singakerta, maka sepat siku-siku pamatut, wastu prasiddha mamargi antar, wastu kasidhan manggihin tatujon ngamanggehang Awig-awig puniki.

SARGA I

ARAN LAN

WEWIDANGAN DESA

Pawos 1, Sampun pastika.

Pawos 2, No. 2. Pamutus paruman Desa wates Banjar sakadi sane

sampun manut dresta :

1. Banjar Jukutpaku, watesnya :
 - a. Sisi Kaler : Banjar Danginlabak.
 - b. Sisi Kangin : Tukad Oos.
 - c. Sisi Kelod : Tegalan.
 - d. Sisi Kauh : Carik Subak Delod Desa.
2. Banjar Danginlabak, watesnya :
 - a. Sisi Kaler : Carik Subak Jerokuta.
 - b. Sisi Kangin : Tukad Oos.
 - c. Sisi Kelod : Banjar Jukutpaku.
 - d. Sisi Kauh : Banjar Tengah.
3. Banjar Tengah, watesnya :
 - a. Sisi Kaler : Carik Subak Jerokuta.
 - b. Sisi Kangin : Banjar Danginlabak.
 - c. Sisi Kelod : Carik Subak Delod Desa.
 - d. Sisi Kauh : Banjar Dauh Labak.
4. Banjar Dauhlabak, watesnya :
 - a. Sisi Kaler : Banjar Lobong.
 - b. Sisi Kangin : Banjar Tengah.
 - c. Sisi Kelod : Carik Subak Delod Desa.
 - d. Sisi Kauh : Carik Subak Dauh Desa.
5. Banjar Lobong, watesnya :
 - a. Sisi Kaler : Banjar Katiklantang.
 - b. Sisi Kangin : Carik Subak Jerokuta.
 - c. Sisi Kelod : Banjar Dauh Labak.
 - d. Sisi Kauh : Carik Subak Dauh Desa.
6. Banjar Katiklantang, watesnya :
 - a. Sisi Kaler : Subak Mandi Let.
 - b. Sisi Kangin : Tukad Oos.
 - c. Sisi Kelod : Banjar Lobong.
 - d. Sisi Kauh : Carik Subak Dauh Desa.

(1)

Pawos 3, Sampun Pastika.

**SARGA II
PATITIS LAN PAMIKUKUH**

Pawos 4, Sampun Pastika.

Pawos 5, Sampun Pastika.

**SARGA III
SUKERTA TATA PAKRAMAN
Palet 1
Indik Krama**

Pawos 6, Sampun Pastika.

Pawos 7, Sampun Pastika. Pawos 8,
Sampun Pastika.

Pawos 9, Sampun Pastika.

Pawos 10,

- a. Taler karang antuk nyilih (Hak Guna Pakai).
- b. Sane ngranjing Parhyangan : Dasar Gumuk Parhyangan,
Turus Lumbung, Padma, Kamulan Taksu.
Ngulin karang : ngawit ring genah punika macaru.

Pawos 11,

- a. Pangampel tedun makrama namonin pasangkepan Banjar.
- b. Pamogpog :
 - Tamiu : Ring Desa Adat keni 100 kg beras.
 - Ring banjar keni 150 kg beras miwah kas Banjar.
 - Warga Desa Adat : keni wnatah kas banjar kemaon.

Pawos 12,

- a. Pamidanda Tanjek Laler, manus dadosan.

Pawos 13, Sampun Pastika.

Pawos 14, Indik mapuangkid :

1. Mapawangun – apisan.
2. Mayadnya - nista : apisan.
Madya : tigang rahina.
Utama : awuku.
3. Matepetin – tuguran.
4. Naub/mopog ayah sangkaning magenah doh 10 kg beras satunggil 6 sasih.

Pawos 15,

Krama Desa sane magenah ring Banjar tiosan patut :

- a. Wenten paiketan baos Prajuru.
- b. Nyarengin karya gotong royong ring genah irika.
- c. Nyarengin pasuka dukan.
- d. Nyarengin mitulung yening wenten kalabu baingan.
- e. Mitulung yening wenten baya.

Pawos 16, Sampun Pastika.

Pawos 17, Sampun Pastika.

Pawos 18, Sampun Pastika.

Pawos 19,

- a. Danda Pamлага 500 kg beras maduluran madewa saksi ring Pura Bale Agung.

Palet 2 Indik Prajuru Desa

Pawos 20,

- a. Krama wed Desa Adat Singakerta.
- b. Taler dados krama Pangampel.

Pawos 21,

- a. Sinoman arah akehnya adiri tur suwenya asasih.
- b. Sinoman prantenan namonin piodalan.
- c. Pangala Desa akehnya asiki suang Banjar.

Pawos 22,

(1)

- a. Swadharmaning Prawartaka Desa Adat Singakerta manut ring kawenangan nyane.

Pawos 23,

- a. Kelihan Dinas/Kepala Dusun – polih satengah.
- b. Payangga – polih satengah.

Pawos 24, Sampun Pastika.

Pawos 25, Sampun Pastika.

Pawos 26, Sampun Pastika.

Palet 3 Indik Kulkul

Pawos 27, Sampun Pastika.

Pawos 28,

- a. Danda nepak Kulkul ngawag-awag tan patuduh Prajuru : 25 kg beras.
- b. Pajati suaran Kulkul parabia tios Desa katur ring Desa Adat saha sesari Rp. 10.000,00.

Palet 4 Indik Paruman

Pawos 29,

- a. Danda Pacamil 25 kg beras maduluran prayascita Banjar.

Pawos 30, Sampun Pastika.

Pawos 31, Sampun Pastika.

Pawos 32, Sampun Pastika.

Palet 5 Indik Druwen Desa

Pawos 33, Sampun Pastika.

Pawos 34, Sampun Pastika.

Pawos 35, Sampun Pastika.

Palet 6
Indik Sukerta Pamitegep
Kaping 1
Karang, Tegal lan Carik

Pawos 36,

- a. Yening karang Desa kabawosang antuk Desa, patut kautsahayang margi antuk paigum ring Prajuru sareng sang sane nruwenang.

Pawos 37,

- a. Pamidandan nyane, kairingin antuk paigun ping tiga ring sang keni ring sang sane mamerat kamanggala antuk Prajuru. Prade mamurug keni pamidanda sakadi ring sor :

- Nista : 5 kg beras.
- Mandya : 10 kg beras. - Utama : 25 kg beras.

Yening ping tiga kadanda patut katur ring Sang Mawang Rat.

Kaping 2
Pepayonan

Pawos 38,

- a. Dandan nyane :
 - Yening sajroning adepa agung, dandannya 25 kg beras, tur yening wenten karubuhan, beya katanggung olih sang nruwenang wit.
 - Yening dohan ring adepa agung, dandannya 5 kg beras, yening ngrubuhin keni beya wangunan, sasampune wenten paigum/kawara pinih riin.
- b. Upacara pangaskara karubuhan ring paumahan : Caru Karubuhin miwah Caru Ayam Lima.
Yan ring Kahyangan Caru Rsi Gana.

(1)

Kaping 3
Wewangunan

Pawos 39,

- a. Danda 10 kg beras miwah keni upacara pamayuh Pangentas Karang.

Kaping 4
Wewalungan

Pawos 40,

- a. Danda karusakan akilogram beras.
- b. Danda 5 kg beras miwah pangaskara : - Ring Jaba Sisi : Caru Ayam Siki.
 - Ring Jaba Tengah: Caru Ayam Lima.
 - Ring Jroan : Caru Rsi Gana.
- c. Ngamademang paksi/mabedilan danda 10 kg beras.
- d. Nuba ulam 10 kg beras.

Kaping 5
Bhaya

Pawos 41, Sampun Pastika.

Pawos 42 Sampun Pastika.

Kaping 6
Panyanggran Banjar

Pawos 43, Sampun Pastika.

SARGA IV

SUKERTA TATA AGAMA

Palet 1

Indik Dewa Yadnya

Pawos 44,

- a. Pura Desa – Banjar Dauhlabak miwah Banjar Tengah.
- b. Pura Puseh – Banjar Katiklantang miwah Banjar Lobong.
- c. Pura Dalem – Banjar Danginlabak miwah Banjar Jukutpaku.

Pawos 45, Sampun Pastika.

Pawos 46, Sampun Pastika.

Pawos 47,

- a. Sarin Canang rikala piodalan pah tiga ; Pamangku asiki, Ke Desa Adat kakalih.
- b. Upon palaba satunggil 4 sasih :
 - Pamangku Dalem – 300 kg gabah.
 - Pamangku Desa – 250 kg gabah.
 - Pamangku Puseh – 250 kg gabah.

Pawos 48,

- a. Pamidanda manut kasisipan

Pawos 49,

- a. Pamidanda manut pakantenannya :
 - Nista – malaksana ring Jaba Sisi :
 - Majaljal : Caru Eka Sata.
 - Ngantos ngamedalan rah : Caru Panca Sata.
 - Madia – malaksana ring Jaba Tengah :
 - Majaljal : Caru Eka Sata.
 - Ngantos ngamedalan rah : Caru Panca Sata miwah Rsi Gana Alit.
 - Utama – malaksana ring Jroan :
 - Majaljal : Caru Panca Sata.
 - Ngantos ngamedalan rah : Caru Panca Sata miwah Rsi Gana.

Pawos 50, Sampun Pastika.

Pawos 51,

- a. Karawuhan sangkaning tan patut keni danda :
 - 100 kg beras miwah upacara Prayascita Gumi miwah Caru Rsi Gana.

(1)

Pawos 52, Sampun Pastika.

Palet 2
Indik Rsi Yadnya

Pawos 53, Sampun Pastika.

Pawos 54, Sampun Pastika.

Pawos 55, Sampun Pastika.

Palet 3
Indik Pitra Yadnya

Pawos 28, Sampun Pastika.

Pawos 16, Sampun Pastika.

Pawos 56, Sampun Pastika.

Pawos 57, b.4.1 Patas seda mapendem manut paraem soang-soang
Banjar.

a. Pananjung batu akehnya 100 kg beras.

b. Sang mtempung ngaben pananjung batu 25 kg beras.

Pawos 58,

a. Ngaben ngerit sane keni Banjar sane malaksana beras 100 kg.
Yening soang Banjar, manut pararem soang-soang Banjar.

Pawos 59,

a. Patas Pitra Yadnya Ngaben miwah pangu manut pararem
soang-soang Banjar.

Pawos 60, Sampun Pastika.

Palet 4
Indik Manusa Yadnya

Pawos 61, Sampun Pastika.

Palet 5
Indik Bhuta Yadnya

Pawos 62, Sampun Pastika.

Pawos 63,

- Sang sane saking dura Desa prade mamurug patut ring Sang Ngawa Wenang.
- Yan prade tios Agama patut kawehin panerangan tur katur ring Sang ngawa wenang.

SARGA V
SUKERTA TATA
PAWONGAN
Palet 1
Indik Pawiwahan

Pawos 64,

- a. Sesari Mapatiwangi katur ring Desa Adat akehnya 10 kg beras.

Pawos 65,

- a. Pamidanda 50 kg beras tur katur ring Sang Ngawa Wenang.

Pawos 66, Sampun Pastika.

Pawos 67, Sampun Pastika.

Palet 2
Indik Nyapian

Pawos 68,

- a. Prabeya panepas suaran Kulkul 10 kg beras.
- b. Pamidanda sang palas marabi adung malih keni 20 kg beras.

Pawos 69, Sampun Pastika.

Palet 3
Indik Santana

(1)

Pawos 70,

- a. Kadulurin paigum ring kulawarga miwah sameton.
- b. Tios ring jadmada dura negara (orang asing). Prade meled ring jadmada dura negara, patut wenten sualapatra katerangan pastika saking Pemerintah Indonesia indik ngranjing warga negara Indonesia manut Peraturan Pemerintah Indonesia.

Pawos 71, Sampun Pastika.

Pawos 72,

- a. Manut dresta miwah kawangsan.

Palet 4 Indik Warisan

Pawos 73, Sampun Pastika.

Pawos 74, Sampun Pastika.

Pawos 75, Sampun Pastika.

Pawos 76,

- a. Alpaka Guru Rupaka, sane sampun kanorayang saking kaluwarga.

Pawos 77, Sampun Pastika.

SARGA VI WICARA LAN PAMIDANDA Palet 1 Indik Wicara

Pawos 78, Sampun Pastika.

Pawos 79, Sampun Pastika.

Palet 2 Indik Pamidanda

Pawos 80, Sampun Pastika.

Pawos 81,

2.g. Rerampangan marep ring Prajuru manut bawos pamutus
paruman krama Banjar.

SARGA VII NGUWAH-

NGUWUHIN AWIG-AWIG

Pawos 82, Sampun Pastika.

Pawos 83, Sampun Pastika.

(1)

SARGA VIII PAMUPUT

Pawos 84, Sampun Pastika.

Manut ring pawos 32 Awig-awig Desa Adat Singakerta mawastu prasidha puput pararem puniki majalaran saking paruman Prajuru Desa Adat Singakerta pinaka wakil krama tur kasangga olih payangga Desa.

Pararem punikikararenim duk rahina Redite Kliwon Tulu.

Pananggal kaping 3 (tia) sasih Kesanga, Isaka 1920 tanggal 01 Maret 1998.

Pararem puniki Kalingga tanganin olih :

1. Bandesa Adat Singakerta <u>(Ida Bagus Ketut Geria)</u>	2. Panyarikan <u>(Ida Bagus Putra Pudharta)</u>
3. Kelihan Adat Jukutpaku <u>(I Ketut Murjana)</u>	4. Kelihan Adat Dangin labak <u>(I Nyoman Daging)</u>
5. Kelihan Adat Tengah <u>(I Nyoman Rata)</u>	6. Kelihan Adat Dauhlabak <u>(I Ketut Tomblos)</u>
7. Kelihan Adat Lobong <u>(I Wayan Utama)</u>	8. Kelihan Adat Katiklantang <u>(I Wayan Sapuh)</u>

Prajuru Dines :

1.	Kepala Dusun Jukutpaku <u>(I Gusti Made Repot)</u>	2.	Kepala Dusun Danginlabak <u>(Dewa Made Darsana)</u>
3.	Kepala Dusun Tengah <u>(I Ketut Garus)</u>	4.	Kepala Dusun Dauhlabak <u>(I Made Jara)</u>
5.	Kepala Dusun Lobong <u>(I Ketut Tamba)</u>	6.	Kepala Dusun Katiklantang <u>(I Wayan Kaler)</u>

7. Kepala Desa Singakerta

(I Dewa Nyoman Arta)

ARTI KRUNA (KAMUS)

Atur supeksa = nglaporang.

Artha brana = kasugian.

Ajeg = kukuh, lestari, nglimbak.

Asri = iyas, ngulangunin.

Artha bhaya = kamalingan, kabegal, karampok.

Adiksa widhi = mawinten.

Adung supeksa = paigum baos/musyawarah.

Abangan = genah ngembahang toya.

Balu = nenten madue rabi malih sampun nyapian/seda.

Bhaya = kasengkalan.

Byuta = maiyegan.

Bebinjat/Astra = panak sane nenten wenten ngangkenin.

Cihna = ciri.

Cane = sarana upacara ring paruman.

Catur Dresta = 4 uger-uger :

1. Sastra Dresta = uger sane manut ring linging Agama.
2. Purwa/Kuna Dresta = uger saking riin tur katami ngantos mangkin.
3. Loka Dresta = uger sane kalakananyang ring wewengkon jagat inucap.
4. Desa Dresta = uger sane kalaksanayang ring Desa inucap.

Cedahgga = cacad.

Cuntaka = sebel.

Dresta = uger-uger, tetimbangan.

Dura Desa = desa doh, desa tiosan.

Dura Negara = Negara doh, luar negeri.

Danda = gegendan/dosan marupa jinah/barang.

Dreda atuang = subakti tur satinut.

Durjana = corah.

Dewa Saksi = ngaturang pasaksi ring para Dewa, Bhatara.

Dusta = corah , maling.

Duta = utusan.

Duskreta = orah.

Duracara = palaksana tan manut, plangpang, tungkas.

Durmanggala = ciri manut linggih.

Dudonan = undangan, manut linggih.

Sepat gantung = kaukur antuk tali, prade wit ngliwatin wates.

Saruron = mailon ring maling.

Sad Atatayi = 6 kacorahan sane ngranayang mati.

1. Agnida = nunjelin.
2. Wisadha = ngracun/nyetik.
3. Atharwa = ngleak.
4. Dratikrama = mlagandang/marikosa.
5. Sastraghna = ngamuk.
6. Raja pisuna = misunayang.

Salah pati = mati tan patut.

Satwika Yadnya = Yadnya sane suci manut ring sastra Agama.

Sawa Prateka = ngaben antuk mrateka sawa.

Swasta = ngaben sane sederhana nganggen simbul sang mati.

Sungkan ila = sakit nglalah, lepra, haid, msl.

Sudhiwadani = ngranjing magama Hindu.

Santana paperasan = Santana antuk ngidih.

Siwakarana = piranti pawedan.

Tri Hita Karana = Tetiga sane ngranayang karahajengan.

1. Parhyangan – Pura, paiketan subakti ring Ida sang Hyang Widhi Wasa.
2. Pawongan – Krama, paiketan ring sajroning krama.
3. Palemahan – Wewidangan, paiketan I manusa ring wewidanganya miwah ring sarwa prani miwah wewaungan.

Tanjek laler = buyung matinggah, ngalin paruman/sangkepan.

Tureksa = nilikin.

Tapakan = arca pralingga Bhatar.

Tri Pramana = 3 pangunadika :

1. Saksi = sane manggihin.
2. Bhukti = sampun katara antuk piranti/bukti.
3. Likita = marupa surat-surat.

Tanem tuwuh = papayonanmatuwuh makelo.

Utama = ageng.

Undul = kasuyub.

Ulah pati = nyelap mangda mati.

Wed = mawit saking irika/desa inucap.

Wala = nyamin/jaminan.

Wicara = prakara.

Wakan = kebebasan/ijin.

Yasa kerti = pelaksana sane becik/patut anggen nyanggra karya mabuat.

Nyobyahang = nyiarang.

Netes = natasang.

Nista = alit.

Nikel = kali ping.

Ngalalah = ngambil anggen padruwenan.

Ngarubuhin = nepen, mungkatang wewangunan.

Nyayub = ngembahin, ngecor.

Nglogor = negul, ngandangin, mlembengin.

Nglana = malumbar, ngeleb.

Nabe = guru sane napak sang sulinggih.

Nyawa Resi = ngaben nganggen nyasa adegan kayu cendana.

Pararem = pikenoh paruman sane sampun sumanggemin.

Piranti = sarana, alat-alat.

Prawerti = paridabdab/paritingkah.

Parhyangan = pelinggih.

Pangaskara = upacara.

Panyelediyi = sane ngentosin.

Pasuara = kaputusan.

Pamlaga = pamelin ngranjing makrama.

Pananjung batu = pamelin setra.

Panca Yadnya = Yadnya sane lelima (Dewa Yadnya, Rsi Yadnya, Pitra Yadnya, Manusa Yadnya, Bhuta Yadnya).

Pacamil = ngraos tan paklatu.

Panglokika = tetimbangan.

Patus = papeson rikala wentwn kalayusekaran.

Pratisantana = katurunan maka sami.

Paradara = rabining wong arabi.

Paigum = pamutus baos.

Ruang = pasemetonan, kakantenan.

Rampag = rampas.

Sadacara = manut ring sane sampun kapastikayang ring sastra Agama.

Sumakuta = sutindih.

Sadaka = sang maraga sulinggih.

Swadharma = kapatutan.

Sesana = swadharma, kapatutan.

Sabha = paruman.

Sukat = sikut.

Suara ghora = raos banggras.

Sang Ngawa Wenang = pemerintah.

Sang Rumawos = pengadilan.

Ekajati = mawinten.

Gunakaya = antuk numbas utawi ngidih Gilihan/kacatri =

kasudi, kapilih.

Gamiagamana = pakrab sane tan kapatut/tan dados anggen istri (cingak UU Perkawinan No. 1 Th. 1974 Pasal 8).

Gegulak = sikut.

Geni Bhaya = kagesengan/umah puun.

Jebar = linggah.

Jiwa Bhaya = nyuduk raga, ngentungan raga, ngracun raga.

Kasukertan = kadegdegan, kalanduhan.

Kanorayang = kasepekan, kapecat.

Kahyangan = Pura.

Kapandung = kamaling.

Kawara = kaplungguhang.

Kataban = kaejuk.

Kastha Bhaya = ulung saking papayonan, kacekuk.

Kapangawan = mati anyud.

Kaplagandang = anak istri sane kapaksa kaplaibang pacing kaantenang.

Katiban ulu = kapisunanyang antuk barang malingan.

Karawuhan = katakson, kalinggihan, mandut baos Ida Bhatara.

Karuron = ngembas putra durung waneng tur seda.

Lila = ledang.

Lelanguan = tetabuhan.

Lete = cemer.

Mamurung = nungkasin.

Mumpang laku = palaksana sane nungkasin.

Madia = menengah.

Magaleng ka luan = mawates kaja miwah kangin.

Mis = luu.

Maseserep = ngalihin.

Macingor = macelek lidi/semat ring pusung/rambut.

Madwijati = madiksa.

Masadak = nungingayang.

Masadak = matues, maprasi.

Mapatiwangi = winasa wangsa, ngesodang wangsa.

Nyasa = lambing.

Nglila cita = malancaran. Ngawirang =

mikukuhin.

Nyapian = palas rabi.